

明史彙


志自六十八
至七十一

二十三

卷之三十一
九
四
冊

內閣文庫	
番號	漢 2231
冊數	80 (23)
函號	281 40





明史藁

光祿大夫 經筵講官明史總裁戶部尚書加七級臣王鴻緒奉


敕編撰

兵四

防邊

志第六十八

明初北邊地東起鴨綠西抵嘉峪關中包大寧開平東勝而
嘉峪之外置哈密為屬國延袤萬里設兵鎮戍聯絡其間成
祖都北平辰山負海憑塞為險自棄大寧於兀良哈宣遼間
隔京師屏蔽漸薄已而興和廢開平孤峙難守乃遷衛於獨
石而東勝亦內移宣大延綏皆當敵衝久之河套淪棄寧夏
固原邊患日急哈密入於土魯番關外即絕域矣於是分地



7307

設鎮。凡爲邊者九。曰遼東薊州宣府大同延綏寧夏甘肅太原固原薊州畿地密邇京師。而居庸關者。京師之北門也。隸於昌平。昌平薊州。初皆不設鎮。薊之稱鎮。自嘉靖二十七年。昌平之稱鎮。自嘉靖三十九年。後總名薊鎮。云居庸左轉爲漁陽。盧龍當山海之交。有關曰山海關。外爲遼陽鎮。孤懸千里。三面臨邊。一面阻海。惟山海關一綫。內通前代。俱郡縣其地。明改置衛所。居庸右轉循西山。西北皆塞外。西南襟帶名城數十。古燕趙郊也。其邊鎮曰宣府大同。宣府設衛開平。東接大寧。西聯獨石。而開平興和萬全爲要地。永樂中。開平徙獨石。宣府遂稱重鎮。大同川野平曠。故寇抄特甚。西則平虜威遠。中則右衛水口。皆敵南窺應朔之路。東則天城陽和。爲入

順聖諸川之衝。而平虜西連老營堡。與偏頭關近。套部南行。首涉其境。故大同頗難守。居庸之北。舊松林百餘里。中有間道。騎行可一人。卽元札八兒導兵南入處。紫荆倒馬二關扼焉。而重兵鎮保定。以衛京師。復右轉爲雁門寧武偏頭三關。隸山西鎮。東扞代郡。外斷雲中。內經太原北境。西盡雍河。而雁門絕險。太原省會地。然北直陰山三關。大同內外扼塞。故亦稱邊。自偏頭逾河。稍南爲陝西。陝有三邊四鎮。三邊者。陝西榆林甘肅。三巡撫所轄。四鎮者。延綏寧夏固原甘肅也。榆林舊沿綏德。守在東勝。後東勝內遷失險。而延綏徙榆林。由黃甫川西。至定邊營。千二百餘里。墩堡勾連。橫截套口。西絡寧固二鎮。土風勁悍。將勇士力。北人呼爲橐駝城。斬寧夏西

北卽賀蘭山也。東南阻河內。有漢唐二渠。險固饒沃。守在花馬池。包固原。其中固原州者。故開成縣。自失河套。鳴鏑內馳。乃升縣爲州。與寧夏相唇齒。以固靖甘蘭四衛隸之。其自賀蘭。又西至鎮番。極於甘肅。皆古邊徼地。明置甘州五衛於張掖。肅州衛於酒泉。涼州衛於武威。西寧衛於湟中。又置山丹永昌鎮番莊浪四衛。列鎮河外。薄於沙磧。而肅州西七十里。爲嘉峪關。左右羌戎。尤稱斗絕。此皆自京西。右轉循西。以爲徼者也。西南要害地。亞於九邊。自蘭州南抵洮岷階文界。西接四川。皆吐蕃所出沒。又西南爲雲南。轉爲貴州。又東南轉爲嶺表。中包湘楚。跨百粵。左右江諸蠻獠之屬。窟宅其中。而鄖陽兩廣南贛爲重鎮。九邊楚粵滇黔。形勢各別。皆繚以城。

堡。劃以鎮戍。充以兵食。統以大帥。副以偏裨。轄以監司。鎮以巡撫。聯以總督。此其設險固圉之大畧也。初洪武六年。命徐達爲大將軍。李文忠馮勝爲副。率諸將備山西北平邊。諭令各上方畧。鎮守北平淮安侯華雲龍上言。東自永平薊州密雲。至西五灰嶺外隘口百二十。相距二千二百里。自王平口至官坐嶺口。關隘有九。相距五百餘里。皆宜設戍守。而紫荆關及蘆花山嶺尤要。宜設千戶所守禦。從之。九年。勅燕山前後等十一衛。分兵守邊。關隘之要者四。曰古北口。曰居庸關。曰喜峰口。曰松亭關。烽埃相望。百九十六處。參用南北軍士。徼巡北平都司。又上所轄關隘二百。請以各衛卒戍其地。詔可。時諸王竝塞者。每歲秋勒兵行邊。嘗勅燕晉二王及馮勝。

等巡邏塞外。又勅燕王選精卒抵大寧。敗敵於徹徹兒山。追至兀良哈禿城而還。又命燕王統諸王防邊手。勅戒諭敵騎南行。不寇大寧。卽襲開平。可召張文傑於西涼。劉真宋晟於開平。郭英於遼東。皆以兵會遼王。以護衛軍北出。山西北平亦然。郭英宋晟劉真翼於左。莊得張文傑翼於右。燕與代遼寧谷五王居其中。彼此相護。首尾相救。使敵不知端倪。其備邊之慎如此。成祖時。元本雅失里出沒塞外。殺使者謀內侵。淇國公丘福北伐至臚胸河。五將俱沒。帝怒親征之。被敵幹難河。本雅失里以七騎遁。而馬哈木阿魯台者。故迤北丞相太師。來歸受封。爲順寧和寧王者也。阿魯台兵漸盛。圖犯邊。帝遂移師征之。阿魯台潰走。馬哈木雖入貢。辭悖慢。且留勅

使。帝復率諸將深入。至忽蘭忽失溫。連戰敗之。馬哈木脫身跳。二人者叛服不恒。更相攻擊。而阿魯台害邊尤數。帝於是復親征之。至則悉衆夜遁。乃命諸將分道擊其助惡者兀良哈。親率精騎要之。至屈裂兒河。大勝而返。其後復親征。次西陽河。而阿魯台爲馬哈木子脫驪所敗。乃下詔班師。未幾復率諸將北伐。次天馬峰。前鋒寧陽侯陳懋忠勇王金忠抵答蘭納木兒河。不見敵。帝遣張輔王通等大索山谷。周迴三百餘里。無一人一騎之跡。乃還。帝雄武蓋世。五涉北庭。度可無內侵。顧於邊備甚密。自居庸北戍口。宣府屯堡。長安野狐二嶺。及興和迤西洗馬林。迄山西緣邊諸烟墩。罔不築塞峻垣。深濠。城衛軍戍其隘口。通車騎者。白戶守之。通樵牧者。甲士

十人守之。重門禦暴之意。蓋常凜凜也。洪熙改元。朔州軍士白榮上言。大同蔚朔西北。皆連沙漠。國朝設行都司於大同。又設東勝高山等十衛。緣邊守禦。自諸衛移入內地。惟留一衛於朔。守禦太弱。乞仍還十衛以守邊。興州軍士范濟亦言。朔州大同開平宣府大寧。皆藩籬要地。其土可耕。宜遣將率兵。廣屯種。修城堡。利器械。謹烽火。勤訓練。以備邊騎。皆報可。宣德三年九月。論文武大臣。將因田獵。親歷諸關。警飭兵備。會報兀良哈衆萬餘入大寧。將至寬河。帝選鐵騎三千親征。出喜峰口。夜馳四十里。昧爽至寬河。敵悉衆來戰。帝分兩翼夾擊。而親射殪其前鋒三人。兩翼矢如雨。神機砲疊發。敵遂奔潰。帝以數百騎直前。敵望見黃龍旗。下馬羅拜。請命。皆生

俘之。正統元年。給事中朱純請修塞垣。總兵譚廣亦言。自龍門至獨石。二百五十餘里。獨石至黑峪口。三百餘里。築牆濬濠。工甚艱。不若益墩瞭守。乃增置赤城等堡烟墩二十二。寧夏總兵史昭言。寧夏城池屯堡營墩。俱在河外。自河迤東。至察罕腦兒。抵綏德州。沙漠曠遠。竝無守備。請於花馬池。築立哨馬營。增設烟墩。直抵哈刺瓦刺馬營爲便。大同總兵方政繼以馬營請。欲就半嶺紅寺兒廢營修築。而宣大巡撫李儀以大同平行。東西巡哨不可缺。請遣副總兵。主東路陽和高山天城鎮虜四衛。參將主西路大同左右雲州玉林朔州五衛。而迤北關頭貓兒莊等處。則責之總兵都指揮。專主徼巡。竝如議。後三年。從成國公朱勇奏。塞紫荊關諸隘口。增設守

備軍時死刺脫驪子也先強盛悉并諸部號太師其主脫脫
普花弱不能制也先貢使至二千三百餘人橫索賞賚十四
年犯邊從獨石馬營等處入至貓兒莊犯宣府圍赤城又悉
衆犯大同城堡多陷中官王振請帝親征敗績於土木驛帝
北狩也先擁帝至大同不得入遂南由紫荆被關而入長驅
薄西直門景帝以兵部尙書于謙總督諸軍總兵石亨孫鏗
等力戰却之乃擁上皇出紫荆關北去謙言宣府京師之藩
籬居庸京師之門戶今二邊空虛亟宜選將守備乃以左都
督朱謙佩印鎮宣府僉都御史王竑鎮居庸敵犯宣府謙戰
數有功犯大同者郭登敗之沙窩又大敗之拷栲山犯山西
者杜忠敗之偏頭關犯遼東甘州者亦皆失利引去也先乃

奉上皇歸而遣使通好言者以爲懷窺伺心詔絕之時獨石
馬營八城殘毀未復從于謙議以都督同知孫安鎮守獨石
馬營都給事中葉盛爲山西右參政協贊軍務安盛率兵度
龍門關且戰且守八城完復如舊既而也先篡其主遣使入
貢未幾爲其部哈刺所殺哈刺復被殺於孛來諸部自爲雄
長天順二年孛來犯神木縣復犯定邊營而毛里孩阿羅出
孛羅忽等相繼侵邊無寧歲五年冬阿羅出渡河入套犯延
綏河套三面阻河土沃可耕接陝西榆林堡東至偏頭關西
至寧夏鎮幾二千里南抵邊城北至黃河遠者八九百里近
者二三百里唐三受降城在套北黃河之外元東勝州在受
降城之東明初敵在河外延綏無事正統間漸渡河犯近邊

鎮守都督王禎始築榆林堡城。建緣邊營堡二十四所。歲調延安綏德慶陽三衛官軍分戍。景泰初敵犯延綏。尚未敢深入。至是阿羅出掠邊人爲鄉導。知河套所在。遂駐牧其中。成化元年延綏總兵張傑言。延慶等境廣袤千里。所轄東西二十營堡。每堡一二百人。難以應敵。宜選精兵九千。分爲六哨。分屯府谷神木二縣。龍州榆林二城。高家安邊二堡。庶綏急有備。延安極邊鄜州定邊慶陽。俱在腹裏。相去遼遠。遇警不相顧。宜令鄜慶防秋軍二千餘人。分布沿邊要害以備用。詔如所請。二年秋。毛里孩等犯延慶。阿羅出復勾小王子滿都魯。及能加思蘭。共爲邊患。六年春。命撫寧侯朱永爲總兵。都督劉玉劉聚副之。副都御史王越參贊軍務駐延綏。而馬

文升巡撫陝西。余子俊巡撫延綏。敵犯臨鞏。文升敗之。犯鞏州。深入固原。及好水川。文升檄諸路兵伏湯羊嶺。敵遇伏而遁。子俊大築邊牆。設榆林衛。墾屯田以守邊。榆林遂爲重鎮。十二年。兵部侍郎滕昭總兵英國公張懋條上邊備。言居庸關黃花鎮喜峰口古北口燕河營有團營馬步軍萬五千人。戍守。請益軍五千。分駐永安密雲。以策應遼東涼州鎮番莊浪賀蘭山。迤西從雪山。過河南通靖虜。直至臨鞏。俱敵入掠之路。倘犯臨鞏。恐靖虜固原不能支。請調陝西官軍。益以甘涼臨鞏秦平河洮兵戍。安定會寧。遇警截擊。副參將一人。統涼州銳士五千。扼要屯駐。彼此策應。詔可。於是各邊俱有備。而文升子俊皆日夜治兵。越又善戰。嘗襲敵紅鹽池。燔其廬。

帳滿都魯孛羅忽渡河北去。越又偕太監汪直出大同襲敵威寧海。上首功四百餘級。又出師寧夏。上首功百餘級。當是時邊備修飭。國威頗振。十八年。邊部亦思馬擁衆入大同。聲言報威寧海之怨。尚書余子俊督京營兵禦之。引去。既而小王子犯大同。殺戍將。巡邊侍郎何喬新。謀其守者多老弱。請選精兵。間道出擣之。會敵退不果。而亦思馬大舉穿塞入大同。副總兵周璽以兵三千守懷仁。敵至夏米莊。璽還援。夜選力戰却之。未幾復犯大同。定西侯蔣琬與尚書子俊出禦。抵大同。敵已徙帳北。耀威而還。火篩者。小王子部落之長也。小王子精兵數萬。而火篩最梟黠。弘治十三年。入據河套。明年又犯榆林。文升因地震。指以爲言。乃命保國公朱暉。右都御

史史繼率諸路兵往榆林禦之。暉等覘敵所在。潛師河套。擣其虛。敵聞砲驚遁。其秋火篩復犯大同。威遠勢猖獗甚。乃陞平涼之開成縣爲固原州。設總制府。總陝西三邊軍務。而火篩部之入套者。遂皆指目以爲套寇矣。套之未熾也。平涼固原爲內地。所備惟靖虜。及是皆爲敵衝。旣改固原爲州治。乃隸以四衛。設參遊等官。屹然爲保障焉。十七年秋。大同鎮巡官奏敵入犯。請濟師。帝召三閣臣。命選京軍三萬以往。劉健等言。迤北與朶顏通。潮河川古北口去京近。所當先慮。禁兵未宜輕發。乃止。會敵爲邊將所拒。徐引去。是時陝邊惟甘肅差安。而土魯番屢擾哈密。哈密者古伊吾盧。唐伊州地也。東距肅州。西抵土魯番。各千五百里。北與瓦剌界。爲西域要路。

永樂初設衛。封元裔安克帖木兒爲忠順王。賜金印爲外蕃通諸番貢道。再傳至孛羅帖木兒無子。王母理國事。成化間。土魯番鎖檀阿力侵之。掠王母金印去。鎖檀死。子阿黑麻立。甘肅守臣請封王母外孫都督罕慎爲忠順王。阿黑麻以罕慎非忠順王後。詐而殺之。入貢求封。弘治初。却而不許。王母死。阿黑麻以城印來歸。會曲先安定王遣使入貢。詭稱忠順王裔。乃立其姪陝巴爲忠順王。護歸國。阿黑麻怒。襲執陝巴及金印去。六年。遣兵部侍郎張海都督僉事緱謙行邊海等至甘州。遣哈密人齎書往責阿黑麻歸陝巴。久不報。乃勅修嘉峪關。發番使戍廣西海等。還以無功降調。奪俸有差。迺北方日強。而土魯番阿黑麻亦驕肆。聲言以萬騎攻肅。蹂甘。

令其將牙蘭守哈密。乃勅甘肅巡撫許進。總兵劉寧率師襲之。進等從大道抵哈密城。牙蘭詞知宵遁。師入哈密。得陝巴妻女。拔哈密脅從者八百餘人還。阿黑麻旣執陝巴。朝廷絕不通貢。安置其使於閩廣。阿黑麻乃送陝巴及金印。至甘州而乞還番使等。通貢如舊。文升請許之。賜陝巴蟒玉大帽。爲忠順王。護還哈密。正德元年春。總制三邊都御史楊一清極言正統以來。舍受降而衛東勝。又輟東勝以就延綏。遂使河套沃壤爲寇巢穴。盡失外險。反備南河。陝西邊患。迄無寧歲。宜復守東勝。因河爲固。東接大同。西屬寧夏。使河套千里之地歸我耕牧。則陝右猶可肩息。因上六事。請修築定邊營。迤東邊牆。復寧遠基邊迤。西北堡。增設花馬池。及興武營衛所。

防禦靈州土達。整飭韋州官軍。增修黑山鎮遠關墩臺。帝可其奏。一清旋忤劉瑾罷。所築塞垣僅四十餘里而已。忠順王陝巴既歸。久之死。子拜牙郎嗣位。淫暴。屬部欲害之。拜牙郎棄城走土魯番。滿速兒遂令其將取金印守哈密。遺甘肅鎮巡書索金幣以贖城印。九年秋。命右都御史彭澤總督甘肅軍務。經畧哈密。澤抵甘州遣通事挾繒綺金器說使和好。滿速兒邀以增幣。澤遽上言。滿速兒畏威悔禍已歸城印矣。遂召澤還。滿速兒謀兵罷則益驕。掠關外諸衛。且索所許增幣。復據哈密寇肅州。兵備副使陳九疇拒却之。城印終不歸。十二年秋。帝出居庸。由陽和幸大同。甫移蹕而敵騎數萬入圍陽和。轉掠應州。命邊將力擊始退。明年秋復犯宣府西路。連

營三四十里。命都督郤永軍居庸。參將楊玉軍昌平。都督朱洪軍黃花鎮。宣城伯衛鐔。南寧伯毛良。都督陳義坐營領操。都御史李瓚守白羊口。敵退乃已。嘉靖初。套騎二萬自井兒堡撤牆入固原平涼涇州。先是正德間。小王子有子三人。曰阿爾倫。阿著。滿官。噶。阿爾倫爲其太師。亦不刺所殺。子卜赤。幼。阿著稱小王子。未幾死。子曰吉囊。俺荅。衆仍立卜赤。稱爲亦克罕。衆五萬人。東有岡笛罕。哈爾。填三部。共六萬人居沙漠。東偏與朶顏鄰。西有應紹不。阿爾禿斯。滿官。噶三部。應紹不。阿爾禿斯。故屬亦不刺。後從吉囊。衆可七萬。滿官。噶。故屬火飾。後從俺荅。衆可四萬。吉囊。俺荅。諸種中獨強。皆出入河套。犯延寧。宣大。南有哈刺。噶。哈連二部。哈刺。噶。衆三萬。哈連

衆二萬居宣大塞外。北有兀良罕。故小王子北部也。因隙叛去相攻殺。又西爲瓦剌。可五萬人。皆逐水草。遷徙無定。乘便以窺邊塞。而朶顏亦與北部通。給事中陳時明言。朶顏花當之子把兒孫。與迤北小王子婚。情叵測。京城東北無邊塞。今二邊日親。萬一掩我無備。乘虛而入。不可不慮。宜嚴武備。以壯國威。御史丘養浩。陳薊遼邊務。請以各莊曠。併入關營。使敵至無所掠。而復小河等口關。於外地以扼其要。又請多鑄火器。分給沿邊郡縣。募商糴粟。以實各邊衛所。詔皆如議行之。七年春。帝以哈密弗靖。用張璁桂萼言。起王瓊爲兵部尚書。兼右都御史。提督陝西軍務。初元年秋。滿速兒大舉入甘肅。陳九疇力戰解其圍。滿速兒走肅州。九疇倍道抵肅。與鎮

兵夾擊。斬其驍將衆譁。滿速兒中流矢死。遂以聞。至是瓊言。滿速兒實不死。九疇誣罔。逮繫坐辟。以保河西功。滅死戍邊。其冬。土魯番將牙木蘭。率衆來歸。滿速兒以討叛爲辭。糾死刺犯肅州。及明年則又譯貢獅子。言願歸哈密城。及原掠人口。以求牙木蘭。瓊言哈密旣歸。宜命番將守之。而分置諸部落於肅州境內。爲屬國。令保塞。遂欲縛牙木蘭予之。兵部尚書胡世寧謂。宜專守河西。却哈密不納。牙木蘭本屬部歸正。非叛者。不宜遣還。璫主瓊議。安置戎部於肅境。獨留牙木蘭不遣。如世寧言。九年。滿速兒復貢方物。求牙木蘭。卒不許。會滿速兒爲瓦剌所攻。欲以哈密城與故都督失拜烟荅妻。兵部因請許。土魯番貢稱外臣。自後名存哈密。而金印遂失。忠

順王拜牙郎亦終不可復無何哈密竟爲土魯番所據其夏
俺荅犯寧夏又犯宣府從總制王瓊請發官軍數萬修築寧
夏邊牆自亦不刺殺阿爾倫遜入河西西海邊患自亦不刺
始也秋俺荅又犯陝西冬犯大同旋出松潘犯四川西境前
後殺掠吏民剽畜物以億萬計十一年夏御史徐汝圭言防
邊之要莫先兵食以食言請令延綏漕石州保德之粟自黃
河楚粟由鄖陽汴粟由陝洛汭粟由漢中以達陝右宣大宜
二麥應多方收糴并糴鄰境而京北西南等邊則西運易州
南運軍城北運居庸爲紫荊倒馬白羊諸口備皆招商賃車
爲便以兵言請以宣府遊兵駐右衛懷來爲大同援選補遊
兵於順聖西城爲臨期援永寧等處游兵護衛宣府爲調遣

援直隸八府召募勇敢設法團練爲邊關遠近援其榆林山
陝遊兵各於本處策應報可亦未能盡行也十九年秋俺荅
諸部大舉犯宣府過順聖川抵蔚州總兵白爵雲冒出戰相
繼敗績俺荅留宣府境兩月乃去吉囊俺荅復分道入大同
大掠太原汾州初大同之變諸叛卒走歸北部俺荅擇其黠
桀者多與牛羊帳幕偵伺諸邊其有材智者李天章高懷智
等皆署爲長至是俺荅入塞大同卒陰與約勿掠我人畜我
亦不汝阻敵折箭與誓乃越大同由井坪朔州抵雁門破靈
武關南掠人畜萬計假道大同而歸二十年夏俺荅僞乞貢
不許乃侵邊秋吉囊入大同塞大掠太原境出關未及塞俺
荅復入越太原而南至石州宣大總督樊繼祖不能援縱掠

而去。明年夏，吉囊死，諸子不相屬，分居套中。而俺荅日強盛，有子曰黃台吉，臂偏短，善用兵，部衆畏之。俺荅乃糾青台吉諸部，各擁衆入大同塞，破雁門，掠太原而南。諸將無乘險邀擊者。俺荅復分掠定襄、五臺、孟縣，又自代州出繁峙、靈丘、廣昌，從廣武出關，由大同左衛穿陽和塞而去。凡掠十衛、三十八州縣，晉陽南北烟火蕭然。先是山西數中寇，詔議邊防。巡撫都御史陳講言：大同者，山西之藩籬也。三關門戶也。崞嵐一道，庭除也。藩省諸郡堂室也。老營堡界東長峪者，去大同最遠，故常忽之。敵每從此入，兩鎮俱受其禍。宜遣六千人戍防，以山西兵守大同障，而藩籬可壯。三關地利，以寧武爲中路，莫要於神池；以偏頭爲西路，莫要於老營堡；以雁門爲東

路，莫要於北樓諸口。由神池迤西，則利民堡亦通敵之徑。計偏關之界，則八角所實適中之區。宜令中路參將設於神池，西路參將設於老營堡，東路北樓諸口，增設把總指揮。移神池守備於利民堡，老營堡遊擊於八角所，各增軍設備。而後門戶可固，庭除堂室高枕矣。帝悉許之。規畫雖密，然兵將率選懦，其健者亦僅能自守而已。二十四年，巡按山西御史陳豪言：敵三犯山西，傷殘百萬，費帑金六十億，而戰守曾無尺寸功。諸臣建議動稱屯守，不知敵之內侵，初不由隘口，皆援攀絕壁，蟻附懸崖，邊垣又何足恃。況諸鎮烽卒皆媒敵自爲生計，待其旣入，然後舉烽發砲，蓋不止一時一處爲然。且敵人招我亡命，爲彼鄉導，非時倏至，深入無憚，乞定計決戰，盡

復套地。庶邊患稍弭。明年秋。套騎三萬犯延安。至三原涇陽。殺掠人畜無算。總督三邊侍郎曾銑請復河套。條十八事。又上營陣八圖。帝嘉獎之。銑嘗襲套有功。敵漸移而北。間以輕騎出掠。銑復驅之去。時時擾他境。故銑力主復套。閣臣嚴嵩窺帝指憚兵。劾銑開邊啓釁。悞國計。論死西市。并殺舊輔夏言。事詳言銑傳。二十八年春。俺荅犯大同。直抵懷來。遂犯永寧。總兵周尚文出兵大戰。總督翁萬達率銳卒繼之。俺荅走出塞。明年秋。復犯大同。總兵仇鸞賂使移他塞。遂東趨薊州。攻古北口。都御史王汝孝以砲石却之。俺荅乃佯兵綴薊師。而別遣精騎從間道黃榆溝。潰牆而入。掠懷柔順義。逼通州。巡按御史王忬收漕舟艤。潞河西。拒不使渡。敵由白河東渡。

潞水直薄京師東直門。執御廄內臣八人。令齎嫚書進帝。詭求入貢。仇鸞既賂敵。卽言恐敵犯薊。震驚京師。請以便宜應援。敵攻古北口。遂詔鸞入。以大同兵二萬三千。陣通州河西。保定巡撫楊守謙延綏副將朱楫。各以兵至。拜鸞大將軍。總七鎮兵五萬。鸞故遠屯。而取死敵首六級。及馬十餘。以奏捷。守謙屯城下。兵少不敢擊。兵部尚書丁汝夔大懼。閉門守。戒諸將勿輕戰。帝捕汝夔守謙繫治。而敵掠金帛人畜。欲西奪白羊口。出塞。鸞率諸鎮兵尾之。阨險復東南行。至昌平。猝與鸞遇。縱騎幾獲。鸞裨將救免。鸞更取平民首上之。自爲功。敵循古北口故道去。鸞進大保。汝孝亦以功未減戍邊。而汝夔守謙竝誅。乃改十二團營爲三大營。總三營曰戎政府。以鸞

入理之。鸞嘗密遣使結俺荅義子脫脫。使貢馬互市。俺荅利
貨幣通譯書。鸞力主之。詔可。三十年。開馬市於大同。命兵部
侍郎史道領其事。市畢。俺荅貢良馬。九賜衣幣甚渥。然敵恒
以羸馬索善價。市大同則犯宣府。市宣府則犯大同。朝市暮
掠。以爲常。明年春。入大同塞。掠懷仁。三月。復罷馬市。翁萬達
之總督宣大也。籌邊事甚悉。其言曰。山西保德州河岸。東盡
老營堡。凡二百五十四里。大同西路。丫角山迤北。而東歷中
北路。抵東路之東陽河鎮口臺。凡六百四十七里。宣府西路
西陽河迤東。歷中北路。抵東路之永寧四海冶。凡一千二十
三里。共一千九百餘里。皆逼臨巨寇。險在外者。所謂極邊也。
老營堡轉南而東。歷寧武雁門北樓。至平刑關。盡境約八百

里。又轉南而東。爲保定界。歷龍泉倒馬紫荊之吳王口。插箭
嶺。浮圖峪。至沿河口。約一千七十餘里。又東北爲順天界。歷
高崖白羊。至居庸關。約一百八十餘里。共二千五十餘里。皆
峻山層岡。險在內者。所謂次邊也。敵犯山西。必自大同入。犯
紫荊。必自宣府入。未有不經外邊。能入內邊者。乃疏請修築
宣大邊牆千餘里。烽墩三百六十三所。後以通市故。不復爲
防。遂半爲敵所毀。至是。部臣請勅邊將修補。科臣又言。垣上
宜築高臺建廬。以栖火器。從之。夏四月。仇鸞襲俺荅於威寧
海。敗績而還。朵顏三衛道俺荅。東掠寧遠。復犯薊州塞。鸞疽
發。背不能軍。帝令上大將軍印綬。以總兵時陳代。鸞恚死。陸
炳發其奸。詔戮鸞屍。俺荅聞之。引去。明年冬。朵顏復糾俺荅。

率衆二十萬薄古北口。烽火達京師。總督侍郎楊博防禦甚力。帝卽軍中。賜博襲衣。發帑犒將士。相守八日。敵退徘徊塞下。博募敢死士。持火械夜擾其營。乃遁。三十四年。博以兵部尚書總督宣大軍務。時俺荅圍大同右衛。聞博至。解圍去。博陳善後二十餘事。築牛心諸堡。修烽堠二千八百餘所。三十八年春。把都兒辛愛犯薊鎮。以朶顏影克爲鄉導。入潘家口。掠薊州。總督王忬遣將馬芳以輕兵八千出敵後牽之。遂引去。忬兵尾擊。頗有斬獲。卒以失機論死。四十二年冬。影克糾東西數萬騎。潰牆子嶺入。大掠懷柔順義。總督侍郎楊選坐誅。先是兵部言。薊鎮外鄰大敵。內護京陵。形勢迥異他鎮。然他鎮皆設關隘。如大同之三邊。陝西之固原。宣府之長安嶺。

延綏之夾牆。皆據重險。以壯形勢。而薊獨無。渤海所之南山。陵之東。有蘇家口。實爲阨塞地。自此直抵張家灣。一百十里。張灣至通州北塞籬村四十里。有白河水深沒馬。可據爲守。惟塞籬村至蘇家口七十里。地形平漫。最爲敵衝。若築臺界牆。設兵以守。與京兵相夾制。庶免疎虞。詔如議行。其後薊鎮入衛兵。俱聽宣大督撫調遣。兵力單弱。朶顏遂乘虛歲侵矣。隆慶初。黃台吉窺陵後南山。俺荅陷石州。掠交汾。朶顏董狐狸。亦糾土蠻數萬騎。入界嶺口。援師四集。乃引去。影克出義院口。邊軍以火鎗斃之。四年冬。俺荅孫把漢那吉率其屬來歸。總督王崇古留之。俺荅乃以款來。崇古要其縛叛示信。俺荅遂定盟通貢市馬。執叛人趙全等九人以獻。乃遣使送歸。

那吉封俺荅爲順義王。其妻三娘子爲順義夫人。子弟部落皆予官。而俺荅弟老把都擁十萬騎駐牧宣府塞。恥與俺荅會盟。諸節帥以餌中之。亦上表通貢。於是西部悉歸命。而朶顏屢擾薊邊。董狐狸長昂先後出沒塞下。總兵戚繼光屢敗之。萬曆七年俺荅死。其子孫黃台吉扯力克相繼襲封。四十年扯力克死。卜失兔以長孫嗣封。部落多散。遂不競。而長昂董狐狸擾塞。輒爲邊將所擊敗。秦寧伯言把都屢入塞。亦失利去。伯言中流矢死。長昂獵而殞。董狐狸懼邊將搗巢。率屬款關。勢稍弱。然自隆萬四十餘年間。諸部交橫。而土蠻部落。虎墩兔炒花宰賽煖兔輩。東西煽動。將士疲於奔命。未嘗得安枕也。西北三邊外。苗蠻諸地屢寇亂。而安南最劇。太祖

定天下。以安南首臣服。戒後世毋輕伐。及黎季犛篡逆拒王命。成祖命二十五將軍討之。擒季犛父子。陳氏已絕。遂郡縣其地。置交趾都布按三司。後數反覆。宣宗因以畀黎利。至嘉靖間。莫登庸篡黎氏。改國號大正。命將往討。登庸束身歸罪。乃降安南國。爲安南都統使司。以登庸爲使。世世修貢。雲南地界百蠻。自洪武十五年設布政使。二十一年以將軍沐英往鎮。遂令世守。屬部最著者。麓川緬甸。皆在金沙江南麓川。自洪武中設宣慰使司。後復寇叛。沐英討定之。正統中叛服靡常。定西伯蔣貴兵部尙書王驥往征。前後斬馘五萬。立隴川宣撫司。以麓川部長恭順爲使。迄弘治中。其黨猶互讐殺。緬甸之地。東至八百。南至海。西至孟養。北至猛密。東北三十

八程至雲南。洪武末遣使來貢。置緬甸宣慰司。以其長普刺浪為使。後屢犯順。先後進討。至萬曆中。為暹羅所攻。不復內侵。廣西諸土族。岑氏為大。明初元安撫岑伯顏。以田州來歸。升州為府。即令伯顏知府事。四傳至岑猛。坐事貶秩。或告猛反。都御史姚鏞疏請征猛歸順。知州岑璋斬以獻。時弘治十八年也。嘉靖初。王守仁代鏞請降府為州。以猛子邦相為田州判官。盧蘇王受為巡檢。別立思恩府。設流官統之。蘇旋殺邦相。朝廷以總督蔡經言。釋蘇不問。而官邦相兄子芝。潯州之境。萬山盤蠱。中有水曰潯江。夾江諸山。皆砢砢巖巖。最險惡處。為大藤峽。南截潯水為府江。自藤峽至府江。三百餘里。諸蠻恃藤峽為奧區。景泰間。猺渠侯大狗等倡亂。守吏不能

制。至天順時。益蔓延。高雷廉諸部。所至殘燬。乃屬浙江參政韓雍討之。誅其渠魁。易名斷藤峽。嘉靖初。遺孽漸熾。王守仁總督兩廣。前後擒斬三千餘人。兩江底定。至十五年。復出寇掠。總督蔡經討誅猺渠侯公丁。亂乃弭。四川三面皆蠻峒。依山為險。而都掌尤甚。古屬犍為郡。宋為多岡縣。在敘州西徧介川貴間。僻而且饒。與永寧芒部烏撒接。明初降附。隨地分插。入籍輸賦。分山都水都隸戎縣。而山都尤黠逆。深阻莫可詰。遂以蠻名。宣德初出掠。守臣討破之。成化間。復掠邊境。襄城伯李瑾討斬二千人。隆慶六年。敘民告難。巡撫曾省吾。總兵劉顯會勦。設伏懸崖。進攻之。焚營舍七千。得蠻王三十六人。拓地四百餘里。於是都掌蠻悉平。都蠻與播州相唇齒。萬

曆二十年。播州宣慰使楊應龍反。播本夜郎。且蘭地。唐置郎州。改播州。乾符間。楊端破南詔。授武畧將軍。由宋歷元。皆世官。明初。楊鑑內附。改播州宣慰使司。隸四川。廣袤千里。介川湖貴三省。西北塹山。東南傅江。二安撫。六長官司。統七姓。世爲目把。應龍結關外生苗爲羽翼。劫掠諸屬部。屬部告應龍。且反。詔逮對簿。會倭入朝鮮。應龍願征倭自効。詔釋之。走播不復出。邢玠總督貴州。檄應龍聽勘。抵斬論贖。革其職。子朝棟。以土舍受事。應龍既歸播。分遣土目。置關據險。劫掠無虛日。已又侵湖廣四十八屯。犯綦江及南川江津。乃命總督李化龍。率總兵劉綎等征討。八路兵竝進。綎破大城入。應龍闔室縊。且自焚。分播地爲二。屬蜀者曰遵義。屬黔者曰平越。時

二十八年十二月也。遵義既改流官。府州縣吏多魚肉土著。舊民浸生心。蘭賊奢崇明者。猓羅種也。世官永寧。宣撫使與子奢寅蓄逆心。糾合水西長魯仲賢。莫德等。立應龍族人楊維新爲興國君。天啓元年秋。遣將樊龍。樊虎。赴調重慶。走馬舞槊。殺巡撫徐可求等。據府城。崇明遂乘虛陷遵義。進逼成都。布政使朱燮元。以火砲擊郤之。崇明父子走重慶。詔以燮元巡撫四川。遂復新都。遵義及重慶府。崇明寅遁還永寧。未幾。貴州水西長安邦彥反。統蜀賊苗仲數萬。進圍貴州。幾十月。巡撫王三善救之。邦彥遁走。圍乃解。明年春。川師復永寧。崇明父子窮蹙。投水西。邦彥復助兵合謀。一窺遵義。一窺永寧。官兵合擊。大敗之。三善直入大方。邦彥逃去。而令賊黨詐

降害三善。六年春。水西苗殺奢寅來降。崇明邦彥猶逋誅。崇禎元年。起燮元總督貴湖雲川廣五省軍務。三善之入大方。以失地利陷。燮元嘗建議。滇兵出霑益。斷安効良之援。而別扼天生橋尋甸等。以絕其走。蜀兵臨畢節。斷其交通四裔之路。而別出龍場巖後。以奪其險。黔兵由普定。渡思臘河。徑趨賊巢。而陸廣鴨池擣其虛。粵西出泗城。分兵策應。然後帥大軍由遵義。鼓行而前。會以憂去。至是再莅黔。仍用前策。獲崇明邦彥首。燮元乃檄安位。許以自新。位率土目納款。及死無嗣。燮元奏析水西地。置長世守。西南遂底定焉。

明史彙

志第六十八終

明史彙

志第六十九

光祿大夫 經筵講官明史總裁戶部尚書加七級臣王鴻緒奉 敕編撰

兵五

防海

防江

民壯土兵

鄉兵

清理軍伍

海內之地十有五。而控海者七。故防海特重。吳元年。用浙江行省平章李文忠言。嘉興海鹽海寧。皆設兵戍守。洪武初。命靖海侯吳禎。籍方國珍所部。溫台慶元三府軍士。及蘭秀山無田糧之民。隸各衛為軍。且禁沿海民。不得私出海。時國珍及張士誠餘黨。多竄島嶼間。勾倭為寇。五年。始命浙江福建

造海舟防倭。明年從德慶侯廖永忠言。命廣洋江陰橫海水軍四衛。增置多櫓快船。無事則微巡。寇至則火船薄之。快船逐之。侯禎充總兵官。都督僉事於顯。爲副。領四衛師。京衛及沿海諸衛軍。悉聽節制。每春以舟師出海。分路防倭。迄秋乃還。十七年。命信國公湯和巡視海道。築山東江南北浙東西海上諸城。後三年。命江夏侯周德興抽福建福興漳泉四府三丁之一。爲沿海所戍兵。得萬五千人。移置衛所於要害處。築城十六。復置定海盤石金鄉海門四衛於浙。金山衛於松江之小官場。及青村南匯嘴城二千戶所。又置臨山衛於紹興。及三山瀝海三江等千戶所。而寧波溫台竝海地。先已置八千戶所。曰平陽三江龍山鄞衢大松錢倉新河松門。皆屯

兵以備海寇。二十一年。又命和行視閩粵。築城增兵。置福建沿海指揮使司五。曰福寧鎮東平海永寧鎮海。領千戶所十。二曰大金定海梅花萬安莆禧崇武福全金門高浦六鰲銅山玄鍾。二十三年。從衛卒陳仁言。修造蘇州太倉衛海舟。旋令濱海衛所。每百戶置船二艘。巡海上盜賊。巡檢司亦如之。後從山東都司周彥言。建五總寨於寧海衛。與萊州衛八總寨。其轄四十八小寨。已復命都督僉事劉德商。高巡視沿海州郡。魏國公徐輝祖。安陸侯吳傑。巡浙江。又命傑與永定侯張銓。巡廣東。是時海防甚飭。且絕日本貢使。終洪武之世。海上無警。永樂四年。平江伯陳瑄督運遼東還。值倭於沙門島擊破之。追至朝鮮境。上焚其舟。又二年。命豐城侯李彬等緣

海捕倭復招島人蜚戶賈豎漁丁爲兵於是海防益嚴至十七年遼東總兵劉江大破倭於望海埭俘斬二千人無脫者海濱餘寇嘗導倭出沒沿海萬里率罹其害至是斂跡百餘年間未嘗有倭患防海衛卒番上京師以爲常間令文武大臣巡警而已嘉靖中年倭患漸起乃命朱統爲浙江巡撫都御史兼管福建海道提督軍務浙江巡撫之設自此始也言者謂一人不便兼二省部覆言浙無巡撫有警則遣重臣巡視事寧卽止乃改巡撫爲巡視統尋以讒去而島倭海盜益肆復令王忬提督軍務巡視浙江兼管福興漳泉以俞大猷爲溫台寧紹參將湯克寬爲福興漳泉參將受忬節制又增設金山參將分守蘇松海防尋改爲副總兵官調募江南北

徐邳官民兵以充戰守遷克寬爲之而杭嘉湖亦增參將及兵備道三十三年以張經爲右都御史總督南直軍務調撥山東民兵及青州水陸槍手千人赴淮陽聽經調用復從經言調廣西死氏兵五千赴浙直時倭縱掠杭嘉蘇松至踞柘林城爲窟穴江南北通州江陰皆被擾監司任環擊破之經亦有王江涇之捷餘衆乃駕舟出海復犯蘇州於是南御史屠仲律言五事其防海口云倭賊泛海來犯可設險防拒者自浙東西大江南北數郡言之入平陽港則近金鄉入黃花澳則近盤石而逼溫州入海門則越新河而寇台州入寧海關湖頭灣則窺象山定海而瞰寧波入三江口則搖尾於紹興入鱉子門則垂涎於杭郡入乍浦峽則流毒於嘉興入吳淞

江則犯松江。入劉家河七丫港。則掠蘇州。此其大勢也。中間經行。或潛形於馬蹟山。或遯跡於大七洋。及大小衢上下川。故守平陽港。拒黃花澳。據海門之險。則不得犯溫台。塞寧海關。絕湖頭灣。遏三江之口。則不得窺寧台。把驚子門。則不得近杭州。防吳淞。備劉家河七丫港。揚威馬蹟大七洋。大小衢上下川諸險。則不得掩蘇松嘉興。倘一處失守。則蔓延各處。何可以彼此分。且賊長於陸戰。短於水鬪。以船不敵。而火器不備也。謂宜飭治海船。大小船百或五十。聯為一艇。募貫習水工領之。而充以原額水軍。於諸海口。量緩急置防。此禦寇之長算也。部是其議。未幾張經中讒死。胡宗憲代之。兵部言。浙直通秦間。最利水戰。往時多用沙船。破賊請厚賞招徠之。

防禦之法。守海島為上。宜以太倉崇明嘉定上海沙兵。及福蒼東莞等船。守普陀大衢。其陳錢山為浙直分路之始。狼福二山。約束首尾。交接江洋。亦要害地。應督水師固守。帝從其議。已復令直隸吳淞江劉家河福山港鎮江圖山五總。添設遊兵。以壯聲援。聽金山副總兵調度。逾年宗憲款賊徐海。因襲殺之。汪直亦誅。直部三千人。復勾倭入寇。浙直稍帖。而閩廣益騷。三十七年。都御史王詢言。閩之勢。福寧北路之要害也。賊自台溫來者。必犯之。詔安南路之要害也。賊自廣潮來者。必犯之。誠得專將。分守兼轄。賊雖狡悍。豈能越境。請以福建福興為一路。領以參將黎鵬舉。駐福寧永防。自流江烽火門俞山小埕。以至南日山漳泉為一路。領以參將王麟。駐招

安水防自南日山至浯嶼銅山玄鍾走馬溪安邊館凡水陸兵皆聽節制福建省城介在南北去海僅五十里宜有重兵請更設參將一人以署都指揮僉事會清統之部領哨船選募精銳與主客兵相應援部覆從之廣東惠潮亦增設參將駐於揭陽未幾福建巡撫游震得言浙江溫處與福寧接壤倭所出沒地宜進戚繼光為副總兵守之而於福寧增設守備隸繼光節制漳州月港亦通倭要地宜增設守備聽節制於總兵俞大猷延建邵為八閩上游宜募兵以備緩急皆詔可後宗憲被逮乃罷總督官而令浙江巡撫趙炳然兼任軍事炳然因請命定海總兵屬浙江金山總兵屬南直俱兼理水陸兵務互相策應云其後福建莆田倭寇平巡撫譚綸請

復五水寨舊制五水寨者福寧烽火門福州小埕澳興化南日山泉州浯嶼漳州西門澳亦曰銅山凡五寨景泰三年從鎮守尙書薛希璉請所置也綸言福寧南達漳泉建此五寨以阨外洋法甚周悉今宜復舊以烽火門南日山浯嶼三隄為正兵銅山小埕二隄為游兵寨設把總分汛地明斥堠嚴會哨使總覈有經擢戚繼光為總兵鎮守全閩改三路參將為守備分福建新募浙兵為二班各九千人春秋番上各縣民壯以精悍者充補每府委武職一人統督備兵使者以時閱視帝皆是之狼山故設副總兵至是改為鎮守總兵官兼轄江南北四十三年添設廣東海防僉事巡歷東莞迨隆慶初倭弭不為患而諸零寇猶從曾一本等犯碣石他賊林道

乾諸良寶等煽動不已。萬曆三年。以廣東南澳據漳泉要害。設官建鎮。以廣之柘林水寨。及漳之銅山遊卒舟屬之。自倭變以來。沿海大都會。各有督撫重臣總軍務。又有專勅臬臣備兵事。有總鎮大將軍職調度。又有參遊守等官司哨守。而諸所防禦。於粵則有東中西三路。東阨全粵之上游。中防省會之大洋。西禦番寇之突入。於閩則有五水寨。於浙則有六總。金鄉盤石二衛為一總。統於溫處之參將。松門海門二衛為一總。統於金台嚴之參將。昌國衛及外之前後錢爵四所為一總。定海衛及外之後所。鄞衢大嵩為一總。觀海臨山二衛為一總。皆統於寧紹之參將。海寧衛為一總。統於杭嘉湖之參將。於南直隸。則乍浦以東。金山衛阨其衝。設參將。黃浦

以北。吳淞江口當其吭。設總兵。而要地若柘林川沙窪劉家河福山港崇明。賊所出入處。各設把總屯守之。於淮揚則總兵駐通州。遊擊駐廟灣。而大河口狼山周家橋掘港鹽城東海守禦所。則或置把總。或置守備以鎮之。於山東則登州三面青萊東西設巡察海道之副使。管理兵民之參將。總督沿海兵馬備倭之都指揮。而登州文登即墨三營。各有把總官。以統率衛所。於薊遼則大沽海口宿重兵。領以副總兵。而以密雲永平兩遊擊為應援。關以外則以中前前屯中後中左中右五所之兵守各汛。而以寧前協守之參將為應援。三岔以東。九聯城以外。劄鎮江城。以遊擊兵千七百哨海上。其他各以本營兵哨海口。蓋遭倭甚毒。而防海之法亦綦密矣。神

宗中年倭寇朝鮮朝廷大發兵援之先後六載乃設天津巡撫鎮扼海上及倭患平後十餘年巡按南直御史顏思忠言廖角嘴突出海中爲蘇松之肩背淮揚之門戶請分淮安大營兵六百名分屯設備福建巡撫丁繼嗣言松山爲自浙入福之門戶宜選兵汛守三江口係閩中要地而劉澳去三江不遠阨此則三江之捍衛嚴而興化之門庭以固海澄界漳泉往來通番團練營兵皆土著有挂名糜餉者宜易浙兵詔皆允行之至啓禎間海寇猖獗及鄭芝龍降斬李魁奇俘劉香以自効海氛頗息芝龍以海利交通朝貴官署總兵益驕悍至

大清定鼎始降附云先是萬曆中許孚遠撫閩奏築福州海壇山因及澎湖諸嶼言其遙峙海中爲倭必經之地當築城置營且耕且守據海洋要害而浙東沿海諸山若陳錢金塘玉環南麂俱可經理遂於閩浙接壤地設南麂副總兵增兵汛守天啓中以紅毛故福建巡撫南居益陳控守澎湖事宜設遊擊一把總二增兵三千人築城設砲臺以守澎湖之地平灘透迤勢如修蛇歧港零嶼甚多其中汪洋空濶可藏巨艘初爲紅毛所據至是乃奪而守之通計沿海之地自廣東樂會接安南界五千里抵閩又二千里抵浙又二千里抵南直又千八百里抵山東又千二百里涉寶抵盧龍會昌黎抵遼東又千三百餘里抵鴨綠江爲朝鮮界延袤萬餘里島寇皆可乘大要南侵則廣東北侵則淮揚惟閩泉漳與倭直而

浙招寶關則倭貢道在焉。故閩浙防最亟。閩安斯浙安。浙安斯江南北安。山東遼左其偶犯耳。防禦之要如此。

明初建都江左。防江綦嚴。於都城南新江口置營。練水兵八千。已稍至萬二千。造舟四百艘。又設陸兵於北岸浦子口。爲水兵犄角。所轄沿江諸郡。上自九江廣濟黃梅。下抵蘇松通泰。中包安慶池州和州太平。凡盜賊及販私鹽者。悉令巡徼。兼以防倭。永樂時。特命勲臣爲帥視江操。其後兼用都御史。成化四年。錦衣衛僉事馮瑤言。大江汊港非一。鹽徒出沒不常。宜令江兵依地設防。附近哨捕。而於瓜儀太平九江要害處。選老成將領鎮之。從其議。後六年。從守備定西侯蔣瓌奏。調建陽鎮江諸衛軍補諸缺伍者。十三年。命擇武大臣一人。

專操江之職。毋攝營務。以定襄伯郭嵩爲之。又五年。南京都御史白昂請勅沿江要害守備等官。互相應援。并請關防以便行事。遂爲定式。弘治十三年。尙書秦民悅上江防疏。請勅內外守備官勤閱視。而慎坐營官之選。帝從。部覆新江口兩班軍。如京團營操例。首班歇。卽以次班操。嘉靖八年。江陰賊侯仲金等嘯聚江湖。拒殺官兵。執主簿支解之。給事中夏言請專設鎮守江淮總兵官於瀕江要會處。付以捕討之責。乃用崔文爲都督僉事。充總兵官。文奏練卒造舟等六事。報可。亡何盜平。總兵罷不設。仍以其責屬操江。十九年。沙賊黃良秦璠等據馬馱沙掠賈舶。奪運艘。執殺捕盜官。帝欲復設總兵。詰兵部以罷設之故。乃復置鎮守江淮總兵官。給旗牌符

勅提督沿江上下。後復裁罷。三十二年。倭患熾。復設副總兵。駐金山衛。轄沿海至鎮江。與狼山副總兵。水陸相應。時江北俱被倭。於是命都御史史褒善。量調九江安慶官軍。防守京口。圖山等地。言者謂。江海雖異界。而相通之處實多。海寇由江入。不能堵截。由江出。不能追勦。宜治操江都御史罪。久之。給事中范宗吳言。故事。操江都御史防江。應鳳二巡撫防海。後緣倭警。遂以鎮江而下。通常狼福諸處。舊隸二巡撫者。亦隸之操江。以故二撫臣得諉其責。而操江又以向非本屬兵難遙制。亦漠然視之。非委任責成意也。夫江洋在內。海洋在外。圖山以內諸水軍。本操江節制。勢順而事便。若圖山之外。卽爲海洋。通常狼福。備禦諸官。悉節制於兩撫。操江雖有管

轄之名。不得與軍門比。宜定其地。以圖山三江會口。爲操撫分界。報可。其後增上下江兩巡視御史。歲更得舉劾。沿江有司將領。而以南京副僉都御史兼理操江。不另設矣。先是因倭患。增募水兵六千人。隆慶初。都御史吳時來。請量留四之一。以分守要害。而餘悉罷遣。并裁中軍把總等官。已復分沿江汛地以守。而責以上下南北。互相應援。都御史宋儀望言。諸軍爲防江設。宜令分駐江湖口。勿居城市。從之。萬曆二十一年。以倭警。言官請復設京口總兵。南兵部尙書衷貞吉言。吳淞舊設副總兵。居中調度。京口在所轄。若復添總兵一柄。兩操不便。因與巡撫朱鴻謨。操江張養蒙。會議。省總兵增兵道。每當春汛。調備倭都督。統衛所水陸兵。赴守鎮江。後七年。操

江耿定力言。長江千餘里。上江列營五。備兵使者三。下江列營五。備兵使者二。宜取各衛軍伍。各營水兵。簡閱訓練。卽以一道兵精否。爲兵備臣殿最。部議以爲然。故事。南北總哨官。五日一會哨於適中地。將領官亦每月兩至江上會哨。其後多不行。崇禎中。復以勲臣任操江。會哨巡徼皆虛名。非有實也。

軍衛之外。郡縣有民壯。邊郡有土兵。初太祖定江東。立管領民兵萬戶府。循元制也。洪武中。山西行都司言。邊民願備兵械。團結防邊。詔從之。閩浙苦倭。指揮方謙請築城置衛。籍民丁多者爲軍。旣而反爲鄉里患。乃詔互徙浙江福建沿海土軍。時已用民兵。然非召募也。正統二年始募。所在軍餘民壯。

願自効者。分隸操練。於是陝西得四千二百人。人給布二匹。月糧四斗。景泰初。命御史白圭等。往直隸山東西河南。招募民壯也。先犯寧夏。石亨請以山西義勇撥守大同。而紫荆倒馬二關亦用民兵以守。事平免歸。成化二年。邊警日亟。又復二關民兵。毛里孩屢入塞。延綏巡撫盧祥言。近邊土民驍勇敢鬪。可練爲兵。以護田里妻子。勅御史往延安慶陽。選壯者編什伍。號曰土兵。得五千餘人。弘治二年。始立法州縣七八百里以上。里僉民壯五名。五百里四名。三百里三名。百里以上二名。有司訓練。遇警調發。給以行糧。而禁役占買放之弊。富民不願役。則上直於官。官自爲召募。亦或稱機兵。在巡檢司者稱弓兵。後以越境防冬非計。大同巡撫劉宇請免其班。


操。月徵糧銀。解貯大同。而以威遠屯丁舍餘補役。給事中熊偉亦請使民應募者。就附近衛所編伍。詔竝從之。西北諸邊。每鎮當募土兵五千。多不如額。十四年秋。勅大理丞劉憲。太僕少卿王質。挾官銀二十萬。及太僕寺馬價銀四萬。以往。不限番漢人。給五環。抽之戶籍者。人三環。各與糧賞。仍免舍餘一丁助之。指揮千百戶等。募兵以多寡為差。得遷一級。失職者復職。卽令統所募兵。戶部侍郎李孟暘請實軍伍。部覆言。天下都司衛所原額官軍二百七十餘萬。歲久逃故。嘗選民壯三十餘萬。又覈諸衛所舍人餘丁八十八萬。西北諸邊召募土兵。無慮數萬。請如孟暘奏。察有司不操練民壯。私役雜差者。如役占軍人罪。報可。正德中。流賊擾山東。巡撫張鳳選

民兵。令自買馬團操。民不勝其擾。兵部侍郎楊潭以為言。而都御史甯杲所募多無賴子。為御史張璿所劾。嘉靖二十二年。復增州縣民壯額。大者千名。次六七百名。小者五百名。二十九年。俺荅薄都城。既退。議募民兵。以二萬為率。每年四月終。赴近京防禦。後五年。兵部尙書楊博言。按在籍之數。強弱相半。請汰老弱存精銳。在外者發各道為民兵。在京者隸巡捕參將。逃者不補。帝以影占數多。耗糧無用。遣官覈宜罷宜還者。以聞。至隆慶中。張居正陳以勤。又條民兵之利。言直隸八府人。沈鷺健悍。總計戶籍若干。汰單丁老弱。而簡少壯者。父子三人籍其子一。兄弟三人籍其弟一。州與大縣可得兵千六百人。小縣可得千人。中分為二。半為正兵。半為奇兵。登

名尺籍。撫臣操練之。歲無過三月。月無過三次。練畢即令歸農。凡隸尺籍者。復其身。歲操之外。不得別遣。穆宗命所司議行。然自嘉靖後。山東河南民兵。戍薊門者。率徵銀以充名募。萬曆初。山東取徵銀。至五萬六千。貧民困甚。治河之役。給事中張貞觀請益募土兵。以捍淮揚。徐邳畿南盜起。給事中耿隨龍請復民壯舊制。揀選勇健。專捕盜賊。播州之亂。工部侍郎趙可懷請練土著。兵部因言。天下之無兵者。不獨蜀也。各省官軍民壯。宜汰老弱。易以健卒。軍有軍操。印官與操官主之。民有民操。正官與捕官主之。郡守監司。不得牽制。立營分伍。以憑調發。先後皆議行。末年募兵措餉益急。南職方郎中鄒維璉直陳調募之害。而山西參政徐九翰尤極言民兵不

可調。崇禎時。中原盜起。兵部尙書楊嗣昌議令州縣召募鄉兵。專精訓練。工部侍郎張慎言疏其不便者數事。而御史米壽圖又言其害有十。謂不若簡練民兵。增以民壯快手。備禦地方。為便。會嗣昌死。練兵亦不行。

鄉兵所在多有。河南嵩縣曰毛葫蘆。長於走山習短兵。而嵩及盧氏永寧靈寶並多礦兵。又曰角腦曰打手。山東有長竿手。以習長竿名。徐州有箭手。其人善騎射。真定之井陘曰螞螂手。善運石。遠者可百步。保定涿易淮邳亦各勁兵處。僧兵推少林。次則伏牛。伏牛學於少林。以禦礦盜者。又次為五臺。五臺之傳本楊氏。所謂楊家鎗也。閩漳泉習鏢牌。而水戰為最。泉州永春之蓬壺。產壯士善技擊。正統間沙尤之亂。郭榮



以勵之。土官以次遷職。弘治末。平思明。正德中。平蜀盜。永保兵力爲多。嘉靖中。倭亂。調狼土協剿。而少林僧應募者四十餘人。亦多勝。然以輕進。失地利。有死者。總督張經。王江涇之捷。倚永保尤力。經故鎮粵。狼兵服其威。迨經以讒逮。狼土兵大憤。各散去。犯律焚劫。百姓苦之。御史屠仲律。請治主將彭蓋臣等罪。部議以蓋臣有功。不便黜戮。止切責之。而治其部兵首亂者。因勅督撫。團練鄉兵。無輕調發。云。商竈鹽丁。以私販爲業。最効果。成化初。毛里孩犯陝河東。鹽徒千百羣。自備火砲。戰車積弩。雜官軍中。逐寇絕河。捆載皮角私鹽以歸。松江曹涇鹽徒。常與倭格。倭敗走島中。追焚其舟。生倭至。乃脫。自後見民家有齏囊者。輒搖手相戒。溪峒諸獮。趨捷敢鬪。萬

曆中。哮拜叛。陝撫葉夢熊。欲募貴州苗羅三千。以充選鋒。苗兵不待檄。自備資糧而前。會拜平乃已。其後總督邢玠。救朝鮮。復議調川東施州衛八司。西陽石砭土司。邑梅平茶二長官司。湖廣永保土司兵萬人。不足則取之。敘馬瀘之屬。部議以川獠叛服靡常。允調其半。玠復言。土兵土司。所以守衛。先年調征九絲膩。乃黃中。累立戰功。議者謂其悍而難制。亦在有以馭之耳。乃命悉如所請。初播州楊應龍。數從征。見官兵弱。每借土司所斬級。以論功。遂驕蹇不奉法。卒以致亂。末年邊事棘。當事者率以徵調三省土司爲長策。戶部主事楊嗣昌言。黔蜀之役。水藺相爭。以莫解之寃。其行間之役。勢必有變。不報。未幾科臣明時舉。調兵蜀中。文武大吏。俱臨重慶誓

小旗逃五人。總旗逃二十五人者。降如前。百戶逃三十人者。月減俸一石。遞減至三石者。罰如四石之例。千戶逃至百人者。月減俸一石。遞減至八石者。罰如十石之例。十六年。令五軍都督府。檄外衛所官軍伍有缺。速遣追逮。給事中潘庸等分行清理之。明年。從兵部尚書俞綸言。五府十衛軍士亡故。戶絕丁盡者。無冒取同姓。及同姓之親。第令有司覆實發補。府衛毋特遣人。二十一年。詔各衛所覈實軍伍有匿已子。以養子代充者。不許。其秋。令各衛所。以軍士姓名鄉貫著為籍。具載丁口數。取丁補伍。按籍求之。兵部置軍籍勘合。分給內外衛所軍士。遇點閱。則以此為驗。二十五年。命公馮勝。傅友德。李景隆。侯耿炳文等。分往山西。陝西。河南等衛。簡閱士馬。

成祖初。遣給事等官。分閱天下軍。重定垛集軍更代法。初。戶三丁以上。垛正軍一名。別有貼戶。正軍病死。貼戶丁補役。至是。令正軍貼戶。輪次更代。週而復始。貼戶單丁者。免當軍之家。蠲其一丁徭。洪熙元年。興州左屯衛軍范濟。極言勾軍之擾。而富峪衛百戶錢興。奏言。祖本涿鹿衛軍。祖死。父繼。以功授百戶。臣已襲父職。而本衛猶以臣祖為逃軍。屢行追取。帝謂尚書張本曰。軍伍不清。弊多類此。凡訴重役及冒名者。必詳覈之。宣德時。軍政弊滋。奸黠者往往匿其籍。或誣攘良民充伍。始遣吏部侍郎黃宗載等。分行天下。清理軍衛。諭兵部曰。朝廷於軍民如舟車任載。不可偏重。宜令有司審實軍民。毋混。三年。勅給事御史清軍。定十一條例。榜示天下。明年。復

增爲二十二條。上虞人李志道充楚雄衛軍。死而無繼。有孫宗臯。已中鄉試。從尚書張本請。依洪武中石堅例。開其伍俾讀書會試。明年本又奏。衛所逃軍。有自洪永迄今。勾取未獲者。請遍行天下。官吏軍旗等。公勘無踪者。開豁如其言。六年。令衛所勾軍。有親老疾獨子者。傅之近地。餘丁赴工。逋亡者。例發口外。改爲罰工一年。以示優恤。八年。放免蘇州衛抑配軍百五十九人。已食糧而止。令終本身者。千二百三十九人。先是御史李立清軍。蘇常戶絕者。株累黨族。動以千計。蘇州知府況鍾奏其事。常州民包謙等七百餘人。又訴受抑爲軍。故特勅巡撫侍郎周忱清理之。英宗初。勾補之軍。全家死亡者。報部除籍。逃軍死亡。及事故者。或家本軍籍。而偶同姓名。

里胥挾讐妄報。朦朧冒解者。或已解而赴部聲冤者。皆與豁免。補伍之例。北人往南極邊。南人往北極邊。大學士楊士奇言。南北異宜。更易其地。濱於天折。良可痛心。請從南北所宜。發戍。以便兵政。署兵部侍郎鄺埜。以爲紊祖制。寢不行。成化二年。山西巡撫李侃復請就近補衛。始議行之。十一年。復命御史胡敬等十一人。分道清軍。以十分爲率。清三分者。最不及者。殿時以罪謫者。逃故亦勾其家丁以補。御史江昂謂。非罰弗及嗣之義。乃從部議禁止之。榆林衛有土兵以助軍。有戶丁屯種以養兵。其後戶丁多逃歸者。議者請勿勾。弘治四年。鎮巡官言。土兵戶丁耕守相資。逃歸者請免原籍本戶糧。差一年。逋租亦暫蠲之。秋成後。遣還衛所屯種。衛所但檄原

籍查取。毋卽勾攝。從之。正德二年。命陝西八府。當徙南方軍士。改編寧夏後衛。及興武營。守禦千戶所。足千人。乃止。從總制楊一清請也。嘉靖初。捕亡令愈苛。有株累數十家。勾攝經數十年者。丁盡戶絕。移覆數十回。仍發冊清勾。兵部尙書胡世寧。請覈額軍及故絕之數。累經清報者免勾。其不冝差役者。類緩急難倚之人。急改編原籍。衛所有缺伍。則另選舍餘及犯罪者充補。犯重發邊衛者。責賣家產。闔房遷發。使絕顧念。庶衛卒皆土著。畏法而逃亡益鮮。帝是其言。其後本兵王憲。用主事王學益議。畫製勾單。立法詳善。久之。停差清軍。御史寬管。解逃軍及軍赴衛違限之科。清軍官日玩愒。文卷磨滅。冊籍訛舛。議者復請申飭。萬曆三年。給事中徐貞明言。勾

軍東南離其骨肉。而軍裝出於戶丁。幫解出於里遞。每軍不下百金。大困東南之民。究無補於軍政。宜視班匠例。免其解補。而重徵班銀。以資召募。使東南之勾補永罷。而西北之行伍漸充。鄖陽巡撫王世貞。因言其有四便。應勾之戶。樂於就近。不圖規匿便一。各安水土。不至困絕便二。近則不逃。逃亦易追。便三。解戶不至破家。便四。兵部卒格貞明議不行。後十三年。南兵部尙書郭應聘。復請南北改編。言北直陝西山西。山後興和遼東。應解南者。俱量改北。南直浙江福建湖廣江西廣東。應解北者。俱量改南。視其額數。彼此交換爲便。又按應勾之軍。南直至六萬六千有奇。一軍株連人或數戶。戶或數人。當不下二三十萬人矣。宜止勾年近者。以次而上。至天

順以前。徑與豁免。其請得報。遠近皆悅。然改編令下。求改衛所者。絡繹相繼。其明年。兵部卽言。什伍漸銷耗。軍衛將空虛。薊遼山陝。重鎮軍人。且將望風逃匿。圖脫軍伍。有旨復舊。而應聘之議。復格不行。按律軍民以籍爲定。軍官不得巧立名色。勾提百姓充軍。民戶亦不得詐稱軍人貼戶。躲避差役。衛所開報逃故。并老疾。勾丁代役軍人。先覈鄉貫居止。內府給批。下有司跟捉正身。正身未獲。先以戶丁解補。仍跟捉正身。其故軍勾戶內壯丁補役。幼小者俟其長成。若送回老疾軍人。以戶下壯丁替役。如勾無戶籍。或居止名姓不同。或係另籍民戶。及戶絕無丁。有司體勘。回申兵部。妄報者罰治。勾數不完。及中途逃者。仍責原差人役勾捉。遷延違限者。法司治

罪。勾捉正身者。謂之跟捕。勾捕家丁者。謂之勾捕。凡軍衛掌於職方。而勾清則武庫司之。或有恩恤開伍者。洪武二十三年。令生員應補軍役者。遣歸卒業是也。如此者絕少。戶有軍籍。必仕至兵部尚書者。始捐除之。軍士應起解者。皆僉妻會解。有津給軍裝之費。有解軍行糧。軍丁口糧。其按籍勾解之冊單。編造有式。齎送有限。有戶口冊。有收軍冊。有清勾冊。嘉靖三十一年。又編四冊。曰軍貫。曰兜底。曰類衛。曰類姓。其勾軍另給軍單。

[Faded text in a large rectangular frame, likely bleed-through from the reverse side of the page.]

明史藁

志第七十

光祿大夫 經筵講官明史總裁戶部尚書加七級臣王鴻緒奉
敕編撰

兵六

教閱

賞功

火器

戰車

戰船

馬政

洪武元年命諸公侯往北平陝西襄陽練兵四年命凡所鎮
撫累戰有功者不比試卽陞千戶以久次陞千戶者比試如
例比試法二人爲耦持鎗角勝負勝者始得陞擢六年令中
書省同大都督府御史臺六部議教練軍士律騎卒必善馳
射鎗刀步兵必善弓弩鎗凡射以十二矢之半遠可到近可

中者爲試中。遠可到將士百六十步。軍士百二十步。近可中五十步。凡穀弩以十二矢內五矢。遠可到蹶張八十步。划車六十步。凡用鎗以進退習熟。凡在京衛所。以五千人爲率。取五之一。指揮千百戶總小旗。率赴御前試驗。餘以次番試。在外都司衛所。每衛五千人。取五之一。千百戶總小旗。赴京驗試。餘以次番試。其所試軍士。騎步皆善。將領各以其能受賞。不中者降罰。軍士中者受賞。不中者給錢六百。爲道里費。自指揮使至小旗所管軍士。三分至六分。不中者等第奪俸。七分以上等第降官。至爲軍。止都指揮使。軍士四分以上。不中者奪俸一年。六分以上。都指揮罷職。後十六年。令天下衛所善射者十選其一。於農隙輪班。赴京較試。不中者罰千百戶

中者。賞鈔有差。邊軍本衛較射。二十年二月。閱武午門。賜將士鈔帛。命自今將軍衛士習射午門丹墀。明年復令天下都司衛所馬步軍士各分十班。冬月赴京較試。指揮千百戶。年深慣戰。及屯田者。免其廩敘。及總小旗陞千百戶鎮撫者。各率所部至京。仍先下操練法。俾遵行之。不如法及不嫻習者。罰明年。詔五軍都督府。凡至京比試。軍士中者分三等。賞鈔有差。仍各賜鈔三錠。爲道里費。不中者亦賜之。明年再試。不如式者。軍移戍雲南。官謫從征。總小旗降充軍伍。凡武臣子弟襲職。弓馬不中者。還衛署事。與半俸。二年後仍試。不及格者降爲軍。成祖出塞。躬閱六師。一卒連中三矢。賜牛羊各一鈔五錠銀碗。二十三年。勅周肅秦晉諸王。各選護衛步騎五

千。命官督赴真定操練。陝西甘肅寧夏大同遼東諸守將。及中都留守河南等都司。徐宿等衛。選步騎兵。遣將統領。分駐真定德州操練。候赴京閱試。宣德三年。命英國公張輔。簡閱京軍。景泰初。兵部尙書于謙。立三大營團操法。兵科給事中鄧林。進軒轅陳圖。因用以教。大將居中。主旗鼓。正北受敵。卽東西二陣爲奇兵。張左右翼以援之。南北東西四隅。準此卽古八陣法也。成化間。增團營爲十二。命兵部尙書白圭提督。月二次會操。仲春十五日起。仲夏十五日止。秋冬亦如之。弘治九年。兵部尙書馬文升。申明洪永操法。五日之內。二日走陣下營。三日演武。正德八年。提督坐營操練。帝亦時至西官廳校閱。尋置威武營。領四鎮卒。躬自團操。然大要以恣馳騁。

備游觀而已。嘉靖六年定。下營布陣。止用三疊陣。及四門方營。其武藝。每營選鎗刀箭牌銃手各一。二人爲教師。轉相教習。俺荅內犯。什伍空虛。始更將領。定營制。兵三十枝。將三十員。員統三千人。以操練之。擇精勇者名。選鋒。厚其校藝之賞。以勸士。總督大臣。月朔初八十五二十三。日會操。餘日營將分練。總協大臣。及巡視科道。隨意入一營。校閱賞罰。擇選鋒者。而帝亦於內教場。團操內使。且置內營。隆慶初。令三大營教師。分上次等。加糧有差。教成全隊者。給冠帶。充把總。餘以次爲功。過全不教練者。責革之。軍官亦按次賞罰。各營將領。全營教練者。加都督僉事。若副將加都督同知。餘以次爲功。過全不教練者。降祖職一級。革任回衛。三年之內。三營訓練。

有成。總協大臣獎諭恩錄。無功績者議罰。時浙江參將戚繼光以善教士聞。先是倭寇東南。繼光調土兵製鴛鴦陣。長短兵夾隊而進。隊十二人。一人居前爲長。次二人夾盾。次二人夾筊。次四人夾長矛。次二人夾短兵。次一火兵居後專事樵蘇。偏則伍之。兩則什之。始爲五行。分爲兩儀。變爲三才。出以方陣。變而員曲。終結以直銳。中正旁奇。坐作進退如法。破倭有效。穆宗時。繼光已官總兵。從給事中吳時來請。命總理薊遼任練兵事。繼光上議用舊練南兵。以倡勇敢。乃調三千人。至待命於郊。自朝至日中。天雨。軍士跬步不移。邊將大駭曰。將軍令如是。於是繼光爲練兵實紀。以訓士。一曰練伍法。首奇次步。次車兵。次輜兵。先選伍次較藝。總之以合營。二曰練

膽氣。使明作止進退之方。上下統屬之禮。及出入相友守望相助之義。三曰練耳。使明號令。四曰練手足。使熟技藝。五曰練營陣。詳布陣起行結營。及交鋒之正變。終之以練將。其所著書。後多遵行之。萬曆十五年。薊遼總督王。一鶚言。自督臣劉應節調南兵六千九百餘名。爲守臺用。十數年來。一騎未敢窺伺。薊兵精整。繼光餘烈也。

洪武二年。大賞平定中原。及征南諸將。白金文幣有差。十七年。雲南平。復大賞將校。及平阿資定。越州。凡官軍二萬三千九人。賜以金銀寶鈔如賞格。二十九年。又大賚天下。致仕武臣。成祖初年。以將士久勞。命禮部依太祖陞賞例。參酌行之。乃定賞格。有奇功。首功。次功之分。然其差次輕重。率臨時取

旨不豫爲令也。承平以後，以首功定賞格。條例漸廣，將士有功，各按立功地面，準例奏行之。凡擒斬功，以北邊爲首，東北邊次之，西番及苗蠻又次之，內地反賊又次之。永樂間，立功賞勘合，定四十字，曰：神威精勇，猛強壯毅，英雄克勝，兼超捷奇，功奮銳鋒，智謀宣妙，略剛烈効，忠誠果敢，能安定揚名，顯大勲，編號用寶，貯於內府，印綬監。迨嘉靖初，又新編四十字，曰：垂拱乾坤，正歡心品，類同發生，資盛德，交泰讓全功，禮正軍容肅，威宣武節，揚深仁，借日月，撫道邁，時康旋置不用。正統十四年，造功賞牌，分奇功、頭功、齊力三等，以大臣王之凡戰挺身先行，突入陣中，斬將奪旗者，與奇功牌；生擒瓦剌，或斬首一級者，與頭功牌；雖無前功而被傷者，與齊力牌。蓋專

爲瓦剌入犯設也。其立功地面，凡甘肅寧夏陝西延綏偏頭關，大同宣府山海關一帶。成化十四年，例一人擒斬一顆者，陞一級；三顆者，陞三級；二人共擒斬一顆，爲首者，陞級同；壯男與實授幼男婦女，與署職爲從，及四顆以上，俱給賞。正德十年，重定陞賞例：一人獨斬一顆，陞一級，不賞；三人共斬一顆，爲首者，陞署一級，爲從給賞；四五六人共功者，爲首給賞，爲從量賞；二人共斬幼小一顆者，爲首陞署一級，爲從量賞；不願陞者，每實授一級，賞銀五十兩，署職二十兩。凡領軍官，成化十四年例，把總領五百人，部下擒斬五顆者，陞一級；每五名加一級；領千人者，以十顆爲率。嘉靖十五年，定把總千總，加至三級而止。都指揮以上，止陞署職二級，其餘加賞，東

北邊外。初定三顆陞一級。至萬曆中。亦與北邊同。陝西甘肅四川貴州兩廣湖廣番寇苗蠻。皆擒斬三顆者陞一級。九顆者陞三級。壯男與實授。幼男婦女與署職。十顆以上。并不及數者。俱給賞萬曆三年。令陝西番寇功次。如成化中例。陞至三級而止。軍官千總。領五百人者。部下斬三十顆。陞一級。領千人者。六十顆。陞一級。把總領五百人者。部下斬十顆。陞一級。領千人者。三十顆。陞一級。俱至三級而止。南方蠻賊。宣德九年。例斬三顆以上。及斬獲首賊者。俱陞一級。不及數與非頭目者。俱加賞。其領軍官。正德十六年。定把總等官。部下擒斬一百顆者。陞署一級。三百顆者。陞實授一級。俱不賞。四百顆者。陞一級。仍計餘功加賞。倭賊。洪武二十九年。例各衛指

揮千百戶。獲倭船一艘及賊者。陞一級。賞銀五十兩。鈔五十錠。軍士水陸擒殺倭賊者。賞銀有差。嘉靖三十五年。定擒斬真倭賊首一顆者。陞實授三級。不願陞者。賞銀百五十兩。從賊一顆。實授一級。漢人脇從一顆。陞署一級。陣亡者。本身及子。實授一級。海洋遇賊有功。均以奇功論。萬曆十二年。更定視嘉靖時例。少變。以賊衆及賊船之多寡。爲功賞之差。復定海洋征戰。不論海寇倭賊。勘是奇功。與世襲雲南夷賊竊發。擒斬功次。視倭功例。陞賞。內地反賊。成化十四年。例一人擒斬六顆。陞一級。至十八顆。陞三級。幼男婦女及十九名以上。與不及數者。俱給賞。流賊。正德七年。例擒斬名賊一顆者。陞實授一級。世襲。爲從者。給賞。擒斬次賊一顆者。賞署一級。從

賊三顆者。實授一級。世襲。陣亡者。陞實授一級。世襲。重傷回營死者。陞署一級。割耳一副者。量賞。二副者。給賞。三副者。陞署一級。世襲。若耳記二副。又有首級一二顆者。俱陞署一級。世襲。不賞。又倍之者。實授一級。世襲。量賞最多者。陞至二級。世襲。其正德五年寧夏功。嘉靖元年江西功。俱視流賊例。其俘獲賊屬人口頭畜器械。成化十四年。例俱給所獲者。其功陞職級。成化十四年。例軍人陞一級。至小旗。舍人陞一級。至冠帶。累而上之。至都督。類推而行。嘉靖四十三年。令軍職立功。陞至都督等官。後有功加陞。無階可加者。取應繼男。廕冠帶。萬曆十三年。定都指揮使陞級者。不授都督。按例賞銀五十兩。陞俸者半之。其有司民兵。隆慶六年。定視軍人例。凡軍

功賞賜之等有三。曰給賞。曰加賞。曰量賞。其奇功。首功。次功。之格。永樂十二年。定。凡交鋒之際。突陣透出其背。殺敗賊衆者。敢勇入陣。斬將搯旗者。本隊已敗賊衆。別隊勝負未決。而能救援克敵者。受命能任其事。出奇破賊成功者。皆爲奇功。齊力進前。首先敗賊者。前隊交鋒未決。後隊向前。殺敗賊衆者。皆爲頭功。頭功卽首功也。行營及下營。時擒獲奸細者。亦准頭功。餘者皆次功。稽功之法甚嚴。而首級論功。非古制。正德間。副使胡世寧言。兩軍相敵。當先格鬪。手眼瞬息。不得差池。何暇割首。割級者多。非殺賊之人。而又或殺已降。或殺良民。或偶得單行之賊。被掠逃出之人。而割之。非真功也。凡有征戰。宜遴選強明剛正之人。爲紀功官。痛懲此弊。而後可。時

弗能行。軍功每多冒濫。鎮守官奏帶例止五名。而其後領兵官所奏有至三四百名者。不在斬馘之列。別立名目。或曰運送神鎗。或曰齎執旗牌。或曰衝鋒破敵。或曰三次當先。或曰軍前効勞。冒功之弊。至斯極已。

古所云礮者。皆發石也。元用西域砲。攻蔡州城。始用火。至明遂爲行軍要器。成祖平交趾。得其神機鎗砲法。特置神機營領之。用生熟赤銅相間。其用鐵者。建鐵性柔。爲最。西鐵性剛。次之。發大將軍西洋砲用車。翼虎砲及百子砲用架。追風鎗用椿。鳥嘴嚙密用托。重器利於守。輕器利於攻。小器利於戰。隨機而用。各有所宜。永樂十年。勅開平備禦成安侯郭亮等。自開平至懷來。宣府萬全。興和諸山頂。皆置五砲架。二十年。

從英國公張輔請。增置於山西大同天城陽和朔州等衛。防邊禦敵。莫如銃砲。然利器不可示人。朝廷亦慎惜之。宣德五年。勅宣府總兵譚廣。神銃國家所重。在邊墩堡。量給以壯軍威。毋輕與人。正統六年。邊將黃真楊洪立神銃局於宣府。獨石。帝以火器外造。恐傳習者多。有漏泄之弊。勅止之。英宗北狩。邊備日亟。十四年冬。御史楊善請鑄兩頭銅銃。各藏鐵彈十枚。俟短鎗盡。敵乘隙而前。則舉銃擊之。景泰元年秋。巡關侍郎江潮言。真定藏都督平安火傘。上用鐵鎗頭。環以響鈴。置火藥筒三。遇敵發之。可潰敵馬。應州民師鞠製銃。有機頃刻三發。及三百步外。俱試驗之。天順八年。延綏參將房能言。麓川破敵用火器。曰九龍筒。一線然則九箭齊發。貴州征苗。

用寸紫窩弓以衛營。動其絲人馬輒應弦仆。請頒式各邊仿造。至嘉靖八年。右都御史汪鋹始言佛郎機之利。佛郎機者。國名也。正德末。其國舶至廣。因得其制。以銅為之。長五六尺。大者重千餘斤。小者百五十斤。巨腹長頸。腹有修孔。以子銃五枚貯藥置其腹。一發百餘丈外。最利水戰。駕以蜈蚣船。所向無不糜者。白沙巡檢何儒得其法。遂令造之。發各邊用。謂之大將軍。二十五年。總督翁萬達奏所造器。兵部試之。言三出連珠。百出先鋒。鐵棒雷飛。俱便用。母子火獸布地雷砲。但可夜劫營。御史張鐸亦進十眼銅砲。大彈七百步。小彈百步。四眼鐵鎗彈。四百步。詔工部如式造用。萬曆十九年。故都督僉事黃應甲以大將軍砲重數百斤。用之甚難。請以堅木做

而製之。鑿空其中。用藤索實以藥彈。輕可舉移。而費亦省。因疏於朝。帝令繪圖進呈。命營將試之。而通判華光大亦奏其父所製神異火器。職方試驗堪用。命下兵部。其後大西洋番船至。復得巨銃曰紅夷。長可二丈餘。重者至三千斤。發之洞裂石城。震數十里。天啓中。錫以大將軍位號。遣官祀之。崇禎初。大學士徐光啓請命西洋人製發各鎮。然將不得人。城守不固。有委而去者。至闖賊逼都城。埤堦間砲聲不絕。皆空器無藥。不能擊賊。而城亦不守矣。明置兵仗軍器二局。分造火器。其名數十。正德嘉靖間者為多。各邊自造。自正統十四年

四川始。弘治以前。軍器局三年一造。椀口銅銃三千。手把銅銃三千。銃箭頭九萬。信砲三千。兵仗局造火車火傘。大將軍二。將軍三。將軍奪門。將軍神鎗。神銃。斬馬銃。手把銅銃。手把鐵銃。椀口銃一。高鋒神機箭銃。襄陽砲。蓋口砲。神砲。

大樣神機砲、小樣神機砲、碗口砲、銅砲、大砲、小砲、旋風銅砲、砲裏砲、弘治以後軍器砲、增造四眼鐵鎗、各號雙頭鐵鎗、夾把鐵手鎗、大中小佛郎機銅銃、佛郎機鐵銃、木廂銅銃、筋繳樺皮鐵銃、十眼銅銃、七眼銅砲、十眼銅砲、兵仗局增造四將軍、五將軍、九龍筒、飛鎗筒、快鎗、無敵手銃、鳥嘴銃、流星砲、三出連珠砲、百出先鋒砲、鐵棒雷飛砲、火獸布地雷砲、虎尾鐵砲、石榴砲、龍虎砲、發熾火器、各邊自造、正統十四年、四川、弘治四年、湖廣、廣西、正德六年、青州、左衛、七年、徐州、十二年、涼州、俱准自造、銅將軍神銃、千其他刀牌弓箭鎗弩狼筈、蒺藜甲冑戰襖、在內則兵仗軍器、鉞工鞍轡之局、屬之內庫、中官掌之、在外則盛甲之廠、屬之兵部、郎官掌之、京省諸司、衛所、又俱有雜造之局、軍資器械、名目繁夥、不具載、惟火器、前代所少、特詳之。

明初設車以供餽運。正統以後始言車戰。雖罕獲其用。第其制不可不詳也。洪武五年造獨轅車。北平山東千兩。山西河

南八百兩。用以轉餉。命徐達李文忠董成。永樂八年北征用武剛車三萬兩。運糧二十萬石。正統十二年從大同總兵朱冕議。用火車以備戰。十四年八月邊警急。給事中李侃請以騾車千兩。鐵索相連。步騎處中。佐以神銃。陣交則車下刀牌五人擊賊。賊退則開索縱騎追之。命造車成。祭而用焉。下車式於邊境。駕馬七匹。軍士十數人。兵仗甚設。寧夏多溝塍。總兵官張泰請用小車。一馬駕轅。中藏兵器。時以為便。箭工周四童言。軍中神機鎗一發不繼。請為車藏鎗二十。箭六百。以又度鎗五。置於車首。一人推。兩人扶。一人爨。試可而後造。景泰元年定襄伯郭登請倣古製。為偏箱車。轅長丈三尺。前後橫轅。濶九尺。高七尺五寸。箱用薄板置銃。出則左右聯絡。前

後轅軫相依。鉤環互牽。布幕舒卷。車載鹿角二。當所屯處。十五步外。鉤連為外藩。車用神鎗銅砲。鎗手強弓。牌手長刀。共甲士十。無事輪番推挽。有事齊力防衛。衣糧器械。俱在車中。外以長車二十兩。載大小將軍銃。每方五兩。轉輸樵採之人。皆處圍中。又置四輪車一。上列五色旗。視敵颯呼之。廷議可以守不可以攻。令登酌行。報可。蘭州守備李進。請造獨輪小車。上施皮屋。其前用板畫獸面。鑿口。置碗口銃四。神機箭十。四鎗四旗。一行以為陣。止以為營。二年。吏部郎中李賢。請造戰車。四圍箱板。人處其中。下穴銃眼。上闢小牕。環列鎗刃。長丈五尺。高六尺四寸。每車前後占地五步。以千兩計。一方表四里。四四十有六。車馬芻糧器械輜重。咸取給焉。騎不得衝。

射不能貫。敵若近前。火砲齊發。奇兵繼出。備邊長策。莫善於此。帝令亟行。成化二年。從郭登言。製軍隊小車。每隊六兩。每兩九人。二人挽。七人番代。車前畫猊首。遠望若城壘然。八年。寧都諸生何京。上禦敵車製。上施鐵網。網穴發鎗弩。行則斂之。五十車為一隊。用士三百七十五人。十二年。左都御史李賓。請造偏箱車五百兩。鹿角榨五百具。相參而用。兵部尚書項忠。請先製車十兩。榨十具。送教場驗閱。竟以登高涉險不便已之。十三年。甘肅總兵王璽。請造雷火車。中立管心木轉軸。放砲從之。二十年。宣大總督余子俊。請以萬人為一軍。用車五百兩。每兩卒十人。車隙以鹿角補之。既成而遲重不可用。謂之鷓鴣軍。弘治十五年。陝西總督秦紘。請用隻輪車。名

曰全勝。前後長丈四尺。車上下共六人。遇敵先發。十兩或五兩。直衝其陣。餘夾攻。扼敵歸路。十六年。閒任知府范吉。獻先鋒霹靂車。嘉靖十一年。南給事中王希文。請製戰車。倣郭固韓琦之制。前銳後方。上置七鎗。外向為櫓。三層各置九牛神弩。一發十矢。按機而動。旁翼以卒。行載甲兵。止為營陣。下邊鎮酌行。十五年。陝西總制劉天和。復言秦紘全勝之便。因其制。稍為損益。上置大小雜兵。以百五十斤為準。箱前畫狡狴。傍列虎盾。二人推。一人挽。一人翼。敵入則倚牆布車。護騎士於中。敵遠則施火器。稍近則弓弩。又近則以短兵接之。復製隨車小帳。令士不露宿。命從其制。三十年。造單輪車千。雙輪車四百。單輪弩車四十。四十三年。京營用兵車十營。共四千。

兩。前帶鹿角。上安拒馬鎗。迎風牌。前後車板竹桿鎗一。長丈五寸。每兩容步卒五人。神鎗夾靶鎗各二。隆慶三年。薊遼總督譚綸。覆都督戚繼光奏。薊昌二鎮。練兵車七營。每營重車百五十六兩。輕車加百。步兵四千。騎兵減千。以東西路副總兵。合撫督標共四營。駐建昌。遵化石匣密雲。以薊遼總兵二營。駐三屯。昌平總兵一營。駐昌平。十二路二千里間。七營車騎相兼。可禦數萬之寇。帝違之。命工部給銀製造。遼東巡撫魏學曾。請設戰車營。倣偏箱之制。上設佛郎機二。下置雷飛砲快鎗六。每車步卒二十五人。以車百二十兩。卒三千人為率。十九年。故都督僉事黃應登言。古者行兵。車戰為務。今因邊部用計。縱火焚車。遂懲而不用。請將車輪鑿空。暗藏火藥。

船兩傍半腰後。每傍五枝。每枝五跳。每跳二人。以板開跳上。露首於外。其制上下止三層。下鎮以石。上爲戰場。中穴梯寢息。其張帆下旋。皆在戰場。戚繼光云。倭舟甚小。一入裏海。大福海。蒼不能入。必用蒼船以追之。衝敵便捷。溫州人所謂蒼山鐵也。鷹沙二船。相需成用。沙船可接戰。上無翼蔽。不能禦火器矢石。鷹船兩頭尖。不辨首尾。進退如飛。傍釘大茅竹。竹間牕可發銃箭。牕內舷外。隱人以盪槳。先馭此入賊隊中。沙船隨後進。短兵相接。戰無不勝。漁船至小。每舟三人。一執布帆。一執槳。一執鳥嘴銃。隨波上下。敵舟瞭望不及。往往取勝。網梭船。定海臨海象山俱有之。其形如梭。用竹梳布帆。僅容二三人。專入大洋。取菜打魚。至山麓輒昇入灘。以避風潮。不

能禦敵。可哨探。蜈蚣船。象形也。專駕佛郎機銃。海舟必因風。惟此船底尖面濶。兩傍楫數十。其行如飛。兩頭船。旋轉在舵。東風則西馳。南風則北馳。海道諸船。無逾其利。武編所載。又有八卦六花船。車輪舸。破船舸。鴛鴦槳。子母舟等名。附見焉。按古車戰。甲士三人。左持弓。右持矛。中執綏。步卒七十二人。隨其後。折旋進退。陣法行乎其間。自晉荀吳毀車爲行。而法漸廢。迨趙武靈王。專用騎兵。古制盡湮。後惟晉馬隆。以偏箱車奏績。唐李靖稱其一治力。一前拒。一束部伍。深得古意。宋制益詳。究無實效。明二百七十年間。僅戚繼光創立軍營。然特以遏敵衝施火器耳。未嘗以戰也。若夫舟楫之用。今古所同。伍員對闔閭。以船軍之教。比陸軍之法。大翼者。當陸軍之

車。小翼者當輕車。突冒者當衝車。樓船者當行樓車。船者當輕足。驃騎要以形制之善。不若運用之宜。故張兵威蓄器械。則用樓船巨艦。趨便利立功效。則取走舸海鷗。在因時而善用之耳。

明代馬政。牧於官者。爲太僕寺。爲各軍衛。爲行太僕寺苑馬寺。卽唐四十八監意。牧於民者。南則直隸應天等府。北則直隸及山東河南等府。卽宋保馬意。其曰備養馬者。始於正統末。選馬給邊。邊馬足而寄牧於畿甸者也。天閑之馬。則特設御馬監。王之者中貴人。牧於大壩等地。而不隸太僕。蓋仿周禮。天子十有二閑意。二者馬政之大凡也。官牧給邊方。民牧給京邸。皆有孳生駒匹。邊用或不足。則以茶易馬於番。萬四

千匹。官牧之地。曰草場。曰荒地。曰熟地。嚴禁令而封表之。牧之人。曰恩軍。曰隊軍。曰改編軍。曰充發軍。曰抽發軍。皆籍而食之。在京衛者。曰錦衣旗手等衛。曰五軍三千神機等營。各設草場於畿甸放牧。歲春末夏初。營馬非存留聽用者。坐營官領下場牧。秋末回營。給事御史。閱視馬斃軍逃者。以聞。牧於寺苑者。種馬上苑萬。中苑七千。下苑四千。苑有圍長。率五十夫。夫牧馬十匹。草場歲徵租金。地畝十七椿。朋十。以佐牧人。市馬凡馬肥瘠登耗。籍其毛齒。而時省之。三歲寺卿偕御史二人。印烙汰其羸劣者。鬻以市馬。邊衛營堡府州縣軍民壯騎操馬。則行寺卿王之。其民牧皆視丁田而授馬。始名曰戶馬。旣名曰種馬。牝十二。牝十八。牝牝五歲。而徵駒印烙。種

馬倒斃孳生不及數。輒賠補以爲常。太祖都金陵。定制南直隸。應天太平鎮江廬州鳳陽揚州六府。滁和二州。令民牧馬。以江南地不宜牧。洪武六年。設太僕寺於滁州。統於兵部。後增滁陽五牧監。領羣四十有八。二十三年。定爲四十監。旋以冗而罷。惟存大興天長舒城三監。而置草場於湯泉滁州等地。復令飛熊廣武英武三衛軍五人共養一馬。馬歲生駒一駒。一歲解京。旣而以牧監羣馬歸有司。專令民牧。江南十一戶。江北五戶。養馬一免其身役。太僕官督理。歲籍駒而用之。正月至六月報。定駒七月至十月報。顯駒十一月報。重駒歲終考。馬政以法治。府州縣正佐首領官吏。凡馬牡曰兒。牝曰騾。兒一騾四爲一羣。羣頭一人。五羣羣長一人。三十年。設

北平及遼東山西陝西甘肅行太僕寺。定牧馬草場。以廣孳牧。成祖初。設太僕寺於行在。王北平山東河南。以舊設者爲南。王應天等六府二州。永樂四年。設苑馬寺於陝西甘肅寺。統六監。監統四苑。又設北京遼東二苑馬寺。所統視陝西甘肅。十二年。定北畿八府民計丁養馬。選居閒官。教之畜養。又定十五丁以下養馬一。十六以上養馬二。爲事編發者。七戶養馬一。除罪爲良民。尋以寺卿楊砥言。北方人戶五丁養一馬。免其田租之半。薊州以東至南海等衛。自戍守軍外。每軍飼種馬一。又定南方養馬例。鳳廬揚滁和五丁一。應天太平鎮十丁一。淮徐初養馬。亦以丁爲率。十八年。罷北京苑馬寺。馬悉牧之民。洪熙元年。令民畜官馬者。二歲徵駒一匹以恤之。

免草糧之半。自是馬日蕃。則散於濟南兗州東昌山東民養馬。自宣德四年始也。又散於彰德衛輝開封河南民養馬。自正統十一年始也。已而也先入犯。遂取馬二萬。寄養近京。謂之寄養騎操馬。盡以其故時種馬。給永平諸府。而寄養之馬。調以充團營。謂之關撥。其各班軍騎操馬。下班日兌與在京官軍。謂之轉兌。景泰三年。令兒馬十八歲。騾馬二十歲以上。免算駒。成化二年。以南方不產馬。改為折色。四年始建太僕寺。常盈庫。貯備用馬價銀。時馬日蕃。滋漸為民困。六年。吏部侍郎葉盛言。向時歲課一駒。而民不擾者。以芻牧地廣。民得為生。馬得自便也。豪右莊田漸多。養馬漸不足。洪熙初。改兩年一駒。成化初。改三年一駒。馬愈削。民愈貧。然馬卒不可少。

於是仍復兩年一駒之例。民愈不堪。請勅各邊。隨土俗所宜。凡可以買馬足邊。軍民交益者。便宜處置。陝西巡撫馬文升。又極論邊軍償馬之累。請以屯田軍士田多丁少。而不領馬者。歲納銀一錢。助丁多田少。而領馬賠償者。雖皆下部從其議。而民困不能舒也。繼文升撫陝者。蕭禎奏省行太僕寺官。兵部議奏云。洪武中。設陝西甘涼行太僕寺。永樂間。復於平涼設苑馬寺。凡茶馬及番人貢馬。悉收寺苑放牧。牧馬常數萬匹。足充邊用。正統以後。邊備漸弛。北敵屢入抄掠。馬遂日耗。言者每請裁革。是惜小費。而忘大計。於是勅諭禎。但令加意督察。而北畿自永樂以來。馬生日孳。輒責民牧。年十五者。皆養馬。太僕少卿彭禮。以田稅有定額。而馬獨歲增。上言。寄

養馬駒。歲課無窮。而民間戶丁。生長有限。以有限之丁。責無窮之駒。民困何由蘇。請定種馬額十萬。歲取駒二萬五千。馬文升爲兵部尚書。覆行其請。乃定兩京太僕種馬兒馬二萬五千。騾馬四之。二年納駒以爲常。時弘治之六年也。十五年冬。兵部尚書劉大夏薦南太常卿楊一清爲副都御史。督理陝西馬政。一清奏言。我朝以陝右宜牧。設苑監跨二千餘里。後皆罷廢。僅存長樂靈武二監。今牧地止數百里。然以供西邊。宜無不足。但苦監牧非人。牧養無法耳。兩監六苑。開城安定。水泉便利。宜爲上苑。牧萬馬。廣寧萬安爲中苑。黑水草場。逼窄清平。地狹土瘠。人無生業。止堪爲下苑。萬安可牧五千。廣寧四千。清平二千。黑水千五百。六苑歲給軍外。可常牧馬

三萬二千五百。足供陝西三邊用。然欲廣孳息。必先多蓄種馬。今馬堪作種者。僅千三百。益以弘治十六年茶易種馬可三千匹。必須增置以滿萬匹。兩年一駒。五年可足前數。請支太僕馬價銀四萬二千兩。於平慶臨鞏買種馬七千。兩監六苑養馬恩隊軍千二百三十名。人數不足。請編逃亡流民及問遣回籍者爲養馬軍。以足原額。且視恩軍例。凡發邊衛充軍者。改令各苑牧馬。增爲三千人。牧三萬。種馬孳息既廣。戶丁亦增矣。又請相度地勢。量地大小。築城浚濠。立市通商。種植榆柳。春夏放牧。秋冬還廄。非惟苑馬可安。敵來亦可收保。孝宗方重邊防。大夏本兵。一清所奏輒行。遷官總制。仍督馬政。苑馬諸監苑原額草場十二萬三千七百餘頃。存者已不

及其半。一清清覈得荒地十二萬八千餘頃。又開武安苑地二千九百餘頃。正德二年。以奏於朝。苑廢羅列。牧軍倍增。幾復監牧之舊。一清去官。未幾遂廢。時御史王濟上言。民間領養種馬。孳生駒匹。苦費莫支。有一孳生馬。輒害殺之。間有定駒。賂醫諱之。有顯駒。則飲以凉水酸泔墜落之。馬之虧欠。不過納銀二兩。卽孳生者。已聞官而復倒死。不過納銀三兩而已。孳生不死。則饑餓馬。馬日瘦削。雖有孳生。無濟實用。今種馬地畝人丁。歲取有定額。請但以其額數。令民買馬。而種馬孳生。縣官無與。兵部是其言。自後每有奏報。輒引濟言。縣官無與種馬事。但責駒於民。遺母求子矣。初邊臣請馬。太僕寺以見馬給之。自改收折色銀。馬日益少。而請者紛然。給價十

萬。作馬萬匹。邊臣不能市良馬。馬多死。太僕寺卿儲燿以爲言。請仍給馬。又指各邊種馬。盜賣私借之弊。語雖切。不能從。而邊鎮給發。轉日益繁。延綏三十六營堡。自弘治十一年始。十年之間。發太僕銀二十八萬有奇。買補四萬九千餘匹。寧夏大同居庸關等不與焉。至正德七年。兵部乃請開納馬之例。凡十二條。九年復發太僕銀。市馬萬五千於山東遼東河南。及廬鳳保定諸府。嘉靖元年。陝西苑馬少卿盧璧條上馬政。請督逋負。明印烙。訓醫藥。均地差。以救目前。而闢場圃。廣孳畜。以爲久計。帝嘉納之。自後條馬政者頗衆。大都因事立說。補救一時而已。二十九年。俺荅窺邊。大同總兵仇鸞請開馬市。以款敵。三邊總督王以旂。宣府巡撫劉壘。相繼請行。然

敵益驕。寇掠不少衰。至三十一年。乃因御史蔡朴疏。罷宣府馬市。時太僕馬缺。仿行正德十二條例。三十七年。又稍增損。至四十一年。遂開捐馬授職例。隆慶二年。提督四夷館太常寺少卿武金言。種馬備用已足三萬之數。宜令每馬折價三十兩。類解太僕。凡所養無用種馬。官盡變賣。一馬十兩。則直隸山東河南種馬十二萬匹。可得銀百二十萬兩。且收草料銀二十四萬。御史謝廷傑言。祖制所定軍機所係。不可輕廢。兵部王廷傑言。而是時內帑缺乏。方遣使分括天下逋負。穆宗獨可金奏。下部覆議之。部請養賣各半。詔從其議。種馬既賣。論者遂以王濟不問孳生為謬論矣。初太僕寺有馬無銀。自成化初。始令不產馬地折銀解寺。然止三萬餘兩。及賣種

馬。回政益衰。而是時通貢互市。太僕所貯無幾。張居正為相。乃力主盡賣之議。自萬曆九年為始。上馬八兩。下馬至五兩。賣銀輸寺。折徵草料。地租銀日益多。以供團營買馬。及各邊之請。然一鬪馬輒發二十金。而州縣以下駟進。其直止數金。且仍寄養於馬戶。民間害不減。國家修繕給賞之費。又往往借支太僕。太僕帑易耗。而邊牧廢弛益甚。十五年。太僕卿羅應鶴言。賣種馬而收其直。是寺帑所蓄。非銀也。即馬也。近年諸臣輕視國馬。挹寺帑。若不竭之府。一切無關馬政者。復名之曰借。豈謀國計哉。請禁之便。二十四年。詔陝西賞功銀給之。太僕寺臣又言。先年寺庫聚積四百餘萬。自東西二役興。支發若流。所存者止百餘萬矣。朝鮮用兵。百萬之積俱空。馬

價不足。借支草料。草料不足。借支子粒。今所存者。子粒朋椿等銀十餘萬耳。矧本寺寄養馬匹。歲額二萬。今歲取折色。則本色派徵甚少。而東征調兌尤多。卒然有警。以兌給則馬不足。以買馬則銀匱竭。何以應之。章下兵部。卒未能振刷也。崇禎之初。察核戶兵工三部。借支寺馬之價。至一千三百餘萬。遼東督師袁崇煥。以關外缺馬。請於兩京州縣。寄養馬內。折給三千匹。買之西邊各市。太僕卿涂國鼎言。祖宗設立馬政。專爲團營騎操。防護都城。原非爲邊鎮也。後來折色。無事則易馬輸銀。有事則出銀市馬。仍是備禦京師之意。今折色銀多給各鎮。如并儀馬盡折。萬一變生。不測奈何。帝是其言。不從。崇煥之請。按明馬政法久弊叢。不可枚舉。而其盛衰大率

由草場之興廢。太祖旣設於江南北。復定北邊牧馬之所。自東勝以西。至寧夏。河西察罕腦兒。東勝以東。至大同。宣府。開平。又東南至大寧。又東至遼東。又東至鴨綠江。又北千里。而南至各衛分守地。又自雁門關外。西抵黃河。渡河至察罕腦兒。東抵紫荆關。又東至居庸關。及古北口。又東至山海衛。凡軍民屯種田地。不得收放。其荒閒平地。及山場腹裏。諸王駙馬。以至極邊軍民。聽其牧放樵採。在邊所封之王。不得豪占。永樂中。又置草場於順天諸府。遣官按視保安州等處地。由順聖川。至桑乾河。廣袤百三十餘里。水草便利。可牧萬馬。遂令回寺先給千騎。令懷來衛軍百人分牧。以行在太僕少卿主之。後增收萬二千匹。宣德初。復置馬坊九於保安州。於是

兵部奏馬大蕃息以色別而名之其種三百六十。吏牘所載者毛色凡二十五等。其後莊田日增草場日削民始困於孳養。弘治初兵部主事湯冕寺卿王霽給事中韓祐周旋御史張淳皆言場地宜清而旋言香河諸縣地俱占於勢家霸州近地俱有仁壽宮皇莊乞罷之以益牧地詔雖允行占佃已久卒不能清。兵部尚書張瑩請以南京各衛牧場還官而御史胡海則言各衛馬少場多若盡還之恐遺地利瑩言遂格。先是團營官馬萬匹夏初牧放入秋回操各衛上直官馬亦皆分置草場每下場之月草料任支後上直馬不下場而騎操馬歲牧如例嘉靖六年武定侯郭勛以邊警為辭奏免團營馬下場各營草場徵租以充公費餘解回寺買馬營馬專

仰秣司農歲費至十八萬戶部為誑而草場益廢議者爭以租佃取贏浸淫至萬曆間日衰弊矣凡馬自官民牧孳生外兼取於邊其收買法有茶市有馬市而中鹽與其中茶市者洪武中立茶馬司於川陝聽西番納馬易茶賜金牌信符以防詐偽每三年遣廷臣召諸番合符交易上馬茶百二十斤中馬七十斤下馬五十斤以私茶出境者死雖勲戚犯無貸末年遣曹國公李景隆齎金牌往用茶五十餘萬斤易番馬萬三千五百餘匹永樂中禁稍弛易馬少乃命戶部嚴邊關茶禁尋遣御史巡督之正統末止茶馬金牌歲遣行人巡察私販邊氓冒禁者多成化間定差御史一員領勅專理茶馬弘治間大學士李東陽言金牌制廢私茶盛行有司又屢以

敝茶給番族。番既抱憾。且往往以羸馬應。臣按唐王忠嗣在朔方。河東互市。高估馬價。諸番爭賣馬於唐。今宜嚴勅陝西官司。揭榜招諭。復金牌之制。嚴收良茶。頗增馬直。則得馬必蕃。及議修苑馬。命楊一清督理。并理茶鹽。一清申舊制。禁私販種官茶。四年間。易兒騶馬九千餘匹。而茶尚積四十餘萬斤。靈州大小鹽池。增課五萬九千有奇。貯慶陽固原庫。以給買馬支三邊用。一清懼後無專官制。終圯也。於正德初。疏言。延綏甘肅邊關重鎮。軍務所急。惟馬。乞令巡茶御史仍兼理馬政。行太僕苑馬等官。聽其提調約束。詔允行之。御史翟唐。歲收茶七十八萬餘斤。易馬九千餘匹。後法復弛。嘉靖初。戶部言。私茶日盛。各番不中馬。而自得茶。請嚴禁之。凡引俱

南戶部印發。郡縣無得擅印。仍以會典及律例所載申明榜示。至三十年。詔給西番諸族勘合。每歲執以爲憑。雖振飭時行。初制終不復矣。馬市者。始永樂間。遼東設市三。一在開原城南。一在城東。一在廣寧城。各去城四十里。聽邊族以馬易貨。成化中。遼撫陳鉞復奏行之。嘉靖中。復開馬市於大同陝邊宣鎮。循例續行。及隆慶五年。俺荅上表稱貢。宣大總督王崇古。市馬七千餘匹。爲價九萬六千有奇。迄萬曆初。遼東市馬不廢。其馬價遼東以米布絹。宣大山西以銀市易。外有貢馬者。以鈔幣加賜之。洪武間。高麗耽羅及撒馬兒罕。俱以馬貢。永樂間。湖廣四川雲南廣西。所隸宣慰使楊昇等。兀良哈頭目。遣部屬脫忽思等。哈密安克帖木兒。遣使臣馬哈木等。

安定衛指揮朵兒只束等及朝鮮國王李芳遠俱以馬貢及正德間兀弩骨赤等進駝馬內附朝廷輒加賞賚所以招攜柔遠長駕遠馭之權在焉

明史藁

志第七十終

明史藁

志第七十一

光祿大夫 經筵講官明史總裁戶部尚書加七級臣王鴻緒奉敕編撰

刑法一

自漢以來刑法沿革不一。隋更五刑之條。設三奏之令。其制最善。唐撰律令。本前代法。故為書。而一準乎禮。以為出入。故唐律為後世法程。五代之際。良意寢失。至宋始採用之。然其時所重者勅而已。律所不載者。則聽之於勅。故其法時輕時重。究無一是之歸。元制取所行一時之例。為條格而已。明初丞相李善長等言。歷代之律。皆以漢九章為宗。至唐始集其成。今制宜遵唐舊。太祖從其言。始太祖懲元縱弛之後。刑用

重典特取決一時非以為則後屢詔釐正至三十年始申畫一之制所以斟酌損益之者至纖至悉子孫守之羣臣有稍議更改卽坐以變亂祖制之罪而後乃滋弊者由於人不知律妄意律舉大綱不足以盡情偽之變於是因律起例因例生例例愈紛而弊愈無窮初詔內外風憲官以講讀律令一條考校有司有不能曉晰者罰有差庶幾人知法意無武健嚴酷之為因循日久視為具文由此奸吏翫法妄立人罪或希上官意指或伺人主喜怒任意比附鍛鍊周內至如律有取自上裁及特旨斷罪臨時處治者因罪在八議不得擅自勾問與一切疑獄罪名難定及律無正文者設非謂朝廷可任情生殺之也英憲以後欽恤之意微偵伺之風熾巨惡大

憝案如山積而旨從中下縱之不問其或本無死理而片紙付詔獄為禍尤烈故綜明代刑法大略而以廠衛終之廠豎姓名傳不備載列之於此使有所考焉

明太祖平武昌卽議律令及立臺省設各道提刑僉事分巡錄囚吳元年冬十月命左丞相李善長為律令總裁官參知政事楊憲傅瓛御史中丞劉基翰林學士陶安等二十人為議律官諭之曰法貴簡當使人易曉若條緒繁多或一事兩端可輕可重吏得因緣為奸非法意也夫網密則水無大魚法密則國無全民卿等悉心參究日具刑名條目以上吾親酌議焉每御西樓召諸臣賜坐從容講論律義十二月書成凡為令一百四十五條律二百八十五條又恐小民不能周

知命大理卿周楨等取所定律令自禮樂制度錢糧選法之外凡民間所行事宜類聚成編訓釋其義頒之郡縣名曰律令直解太祖覽其書而喜曰吾民可以寡過矣洪武元年又命儒臣四人同刑官講唐律日進二十條五年定宦官禁令及親屬相容隱律六年夏刊律令憲綱頒之諸司其冬詔刑部尚書劉惟謙詳定大明律每奏一篇命揭兩廡親加裁酌及成翰林學士宋濂爲表以進曰臣以洪武六年冬十一月受詔明年二月書成篇目一準於唐曰衛禁曰職制曰尸婚曰廢庫曰擅典曰賊盜曰鬪訟曰詐僞曰雜律曰捕亡曰斷獄曰名例採用舊律二百八十八條續律百二十八條舊令改律二十六條因事制律三十一條掇唐律以補遺百二十

三條合六百有六條分爲三十卷或損或益或仍其舊務合輕重之宜九年太祖覽律條猶有未當者命丞相胡惟庸御史大夫汪廣洋等詳議釐正十有三條餘如故十六年命尚書開濟定詐僞律條二十二年刑部言比年條例增損不一以致斷獄失當請編類頒行俾中外知所遵守遂命翰林院同刑部官取比年所增者以類附入改名例律冠於篇首爲卷凡三十爲條四百有六十名例一卷四十七條吏律二卷曰職制十五條曰公式十八條戶律七卷曰戶役十五條曰田宅十條曰婚姻十八條曰倉庫二十四條曰課程八條曰錢債三條曰市廛五條禮律二卷曰祭祀六條曰儀制二十條兵律五卷曰官衛十九條曰軍政二十條曰關津七條曰

廢牧十一條。曰郵驛十八條。刑律十一卷。曰盜賊二十八條。曰人命二十條。曰鬪毆二十二條。曰罵詈八條。曰訴訟十八條。曰受贓十一條。曰詐偽十二條。曰犯姦十條。曰雜犯十一條。曰捕亡八條。曰斷獄二十九條。工律二卷。曰營造九條。曰河防九條。為五刑之圖。凡二。首圖五。曰笞。曰杖。曰徒。曰流。曰死。笞刑五。自一十至五十。每十為一等加減。杖刑五。自六十至一百。每十為一等加減。徒刑五。徒一年杖六十。一年半杖七十。二年杖八十。二年半杖九十。三年杖一百。每杖十及半年。為一等加減。流刑三。二千里。二千五百里。三千里。皆杖一百。每五百里為一等加減。死刑二。絞斬。五刑之外。徒有總徒四年。遇例減一年者有准徒五年。斬絞雜犯減等者流有安置有遷徙。去鄉一千

里杖一百有口外為民。其重者曰充軍。充軍者。明初唯邊方屯種。後定制分極邊烟瘴。邊遠邊衛。沿海附近。軍有終身有永遠。二死之外。有凌遲。以處大逆不道。諸罪者。充軍凌遲。非五刑之正。故圖不列。凡徒流再犯者。流者於原配處所。依工樂戶留住法。三流並決。杖一百。拘役三年。拘役者。流人初止安置。今加以居作。即唐宋所謂加役流也。徒者於原役之所。依所犯杖數。年限決訖。應役無得過四年。次圖七。曰笞。曰杖。曰訊。杖曰柳。曰柎。曰索。曰鐐。鐵笞大頭徑二分七釐。小頭減一分。杖大頭徑三分二釐。小頭減如笞之數。笞杖皆以荆條為之。皆臀受。訊杖大頭徑四分五釐。小頭減如笞杖之數。以荆條為之。臀腿受。笞杖訊皆長三尺五寸。用官降式較勘。毋

以筋膠諸物裝釘。枷自十五斤。至二十五斤。止刻其上。爲長短輕重之數。長五尺五寸。頭廣尺五寸。杻長尺六寸。厚一寸。男子死罪者用之。索鐵爲之。以繫輕罪者。其長尺。鐐鐵連環。之以繫足。徒者帶以輪作。重三斤。又爲喪服之圖。凡八。族親有犯。視服等差。定刑之輕重。其因禮以起義者。養母庶母慈母。皆服三年。毆殺之。與毆殺其嫡母同罪。兄弟妻皆服小功。互爲容隱者。罪得遞減。舅姑之服。皆斬衰三年。毆殺罵詈之者。與夫毆殺罵詈之律同。姨之子。舅之子。姑之子。皆緦麻。是曰表兄弟。不得相爲婚姻。大惡有十。曰謀反。曰謀大逆。曰謀叛。曰惡逆。曰不道。曰大不敬。曰不孝。曰不睦。曰不義。曰內亂。雖常赦不原。貪墨之賊有六。曰監守盜。曰常人盜。曰竊盜。曰

枉法。曰不枉法。曰坐贓。當議者有八。曰議親。曰議故。曰議功。曰議賢。曰議能。曰議勤。曰議貴。曰議賓。時太孫參決庶政。太祖諭之曰。此書首列二刑圖。次列八禮圖者。重禮也。顧愚民無知。若於本條下。卽註寬恤之令。必易而犯法。故以廣大好生之意。總列名例律中。善用法者。會其意可也。太孫請更定五條以上。太祖覽而善之。太孫又請曰。明刑所以弼教。凡與五倫相涉者。宜皆屈法以伸情。乃命改定七十三條。復諭之曰。吾治亂世。刑不得不重。汝治平世。刑自當輕。所謂刑罰世輕世重也。二十五年。刑部言。律條與條例不同者。宜更定。太祖以條例特一時權宜。定律不可改。不從。三十年。作大明律。誥成。御午門。諭羣臣曰。朕倣古爲治。明禮以導民。定律以繩

頑刊著爲令。行之既久。犯者猶衆。故作大誥以示民。使知趨吉避凶之道。古人謂刑爲祥刑。豈非欲民竝生於天地間哉。然法在有司。民不周知。故命刑官。取大誥條目。撮其要略。附載於律。凡榜文禁例。悉除之。自謀逆及律誥所載外。其雜犯大小之罪。悉依贖罪例論斷。編次成書。刊布中外。令天下知所遵守。大誥者。太祖患民狃元習。徇私滅公。罪戾日滋。十八年。采輯官民過犯條爲大誥。其目十條。曰攬納戶。曰安保過付。曰詭寄田糧。曰民人經該不解物。曰灑派拋荒田土。曰倚法爲奸。曰空引偷軍。曰黥刺在逃。曰官吏長解賣囚。曰囊中士夫。不爲君用。其罪至抄劄。次年。復爲續編三編。皆頒學宮。以課士。里置塾師教之。囚有大誥者。罪減等。無則加罪。於時

天下有講讀大誥。師生來朝者。十九萬餘人。竝賜鈔遣還。自律誥出。而大誥所載諸峻令。未嘗輕用。其後罪人。率援大誥以減等。亦不復論其有無矣。蓋太祖之於律令也。草創於吳元年。更定於洪武六年。整齊於二十二年。至三十年。始頒示天下。日久而慮精。一代法始定。中外決獄。一準三十年所頒。其洪武元年之令。有律不載。而具於令者。法司得援以爲證。請於上。而後行焉。凡違令者。罪笞。特旨臨時決罪。不著爲律令者。不在此例。有司輒引比律。致罪有輕重者。以故入論。罪無正條。則引律比附。定擬罪名。達部議定。奏聞。若輒斷決。致罪有出入者。以故失論。大抵明律視唐簡覈。而寬厚不如宋。至其惻隱之意。散見於各條。可舉一以推也。罪應加者。必賊

滿數乃坐。如監守自盜賊至四十貫絞若止三十九貫九十九文欠一文不坐也。加極於流三

千里以次增重終不得至死而減至流者自死而之生無絞

斬之別。即唐律稱加就重條。稱日者以百刻稱年者以三百六十日。如命辜限及各文書違限雖稍不及一時刻仍不得以所限之年月科罪即唐例稱日以百刻條。未老疾犯罪

而事發於老疾以老疾論幼小犯罪而事發於長大以幼小

論。即唐律老小廢疾條。犯死罪非常赦所不原而祖父母父母老無養

者得奏聞取上裁犯徒流者餘罪得收贖存留養親。即唐律罪非十

惡條功臣及五品以上官禁獄者許令親人入侍徒流者竝聽

隨行違者罪杖同居親屬有罪得互相容隱。即唐律同居相

容隱條。奴婢不得首王凡告人者告人祖父不得指其子孫為證弟不

證兄妻不證夫奴婢不證王文職責在奉法犯杖則不敘軍

官至徒流以世功猶得擢用凡若此類或間採唐律或更立

新制所謂原父子之親立君臣之義以權之者也建文帝即

位諭刑官曰大明律皇祖所親定命朕細閱較前代往往加

重蓋刑亂國之典非百世通行之道也朕前所改定皇祖已

命施行然罪可矜疑者尚不止此夫律設大法禮順人情齊

民以刑不若以禮其諭天下有司務崇禮教赦疑獄稱朕嘉

與萬方之意成祖初詔法司問囚一依大明律擬議毋妄引

榜文條例為深文永樂元年定誣告法成化元年又令讞囚

者一依正律盡革所有條例十五年南直隸巡撫王恕言大

明律後有會定見行律百有八條不知所起如兵律多支廩

給刑律罵制使及罵本管長官條皆輕重失倫流傳四方有

誤官守。乞追板焚燬。命卽焚之。有依此律出入人罪者。以故論。十八年。定挾証得財罪例。弘治中。去定律時已百年。用法者日弛。五年。刑部尚書彭韶等。以鴻臚少卿李鏊請。刪定問刑條例。至十三年。刑官復上言。洪武末。定大明律。後又申明大誥。有罪減等。累朝遵用其法。外遺姦。列聖因時推廣之。而有例。例以輔律。非以破律也。乃中外巧法吏。或借便已私。律浸格不用。於是下尚書白昂等。會九卿議。增歷年問刑條例。經久可行者。二百九十七條。帝摘其中六事。令再議。以聞。九卿執奏。乃不果改。然自是以後。律例竝行。而網亦少密。王府禁例六條。諸王無故出城有罰。其法尤嚴。嘉靖七年。保定巡撫王應鵬言。正德間。新增問刑條例。四十四款。深中情法。皆

宜編入。不從。惟詔偽造印信。及竊盜三犯者。不得用可矜例。刑部尚書胡世寧又請。編斷獄新例。亦命止依律文。及弘治十三年。所欽定者。至二十八年。刑部尚書喻茂堅言。自弘治間定例。垂五十年。乞勅臣等。會同三法司。申明問刑條例。及嘉靖元年後。欽定事例。永爲遵守。弘治十三年以後。嘉靖元年以前事例。雖奉詔革除。顧有因事條陳擬議。精當可採者。亦宜詳檢。若官司妄引條例。故入人罪者。當議黜罰。會茂堅去官。詔尚書顧應祥等定議。增至二百四十九條。三十四年。又因尚書何鰲言。增入九事。隆慶元年。定告反不實者抵罪。四年。定官吏犯贓罪者無貸。萬曆時。給事中烏昇請。續增條例。至十三年。刑部尚書舒化等。乃輯嘉靖三十四年以後詔

令及宗藩軍政條例。捕盜條格。漕運議單。與刑名相關者。律爲正文。例爲附註。共三百八十二條。刪世宗時苛令特多。崇禎十四年。刑部尚書劉澤深。復請議定問刑條例。帝以律應恪遵。例有上下事同。而二三其例者。刪定畫一爲是。然時方急法。百司救過不暇。議未及行。初。荊州知府孫存。集刊大明律讀法。兼諸家註解。與正德新例。法司見行事件。上之世宗。世宗弗悅。命罪之。而燬其板。萬曆中。言者請參訂律註。部議恐深文之吏。任註釋而背律文。帝乃却其請。後禮部郎王冑。堂本父都御史樵之。私箋成律例箋釋一書。改正諸家註解。復補註條例。以及見行事例。自後法家皆用之。太祖之定律文也。歷代相承。無敢輕改。其一時變通。或由詔令。或發於廷。

臣奏議。悉著條例中。其有關治體。言獲施行者。不可以無詳也。洪武元年。諭省臣。鞠獄當平恕。古者非大逆不道。罪止及身。民有犯者。毋得連坐。後雖用法嚴峻。而時有縱舍。往往寓詔旨中。尚書開濟嘗言。諸司讞牘。動千萬言。汎濫無紀。多失本情。乃諭繁文出入。人罪者。罪之。命刑科會諸司定議。成式榜示中外。民父以誣逮。其子訴於刑部。法司坐以越訴。太祖曰。子訴父枉。出於至情。不可罪。有子犯法。父賄求免者。御史欲并論父。太祖諭濟曰。子論死。父救之情也。但論其子。赦其父。自今決囚。必詳讞覆奏。無重傷人命。尚書夏恕嘗引漢法。請著律反者。夷三族。太祖曰。古者父子兄弟。罪不相及。漢仍秦舊法太重。却其奏不行。十四年。刑部奏決重刑。太祖曰。十

惡非常赦所原者。則云重刑。雜犯死罪。聽收贖者。勿槩論。又命法司論囚擬律以奏。翰林給事正字司直會議平允。然後覆奏論決。十六年。命濟等議定五六日旬時。三審五覆之法。十七年。左都御史詹徽奏。民毆孕婦至死者。律當絞。其子乞代。大理卿鄒俊議曰。子代父死。情可矜。然死婦係二人之命。犯人當二死之條。與其存犯法之人。孰若全無辜之子。詔從俊議。二十年。徽言。軍人有犯當杖。其人嘗兩得罪而免。宜并論前罪誅之。太祖曰。前罪既宥。復論之。則不信矣。杖而遣之。二十四年。嘉興通判龐安獲鬻私鹽者。送京師。而以鹽賞獲者。戶部以其違例。罰償鹽入官。且責取罪狀。妄言律者萬世之常法。例者一時之旨意。今欲依例而行。則於律內非應捕

人給賞之言。自相違悖。失信於天下也。太祖然其言。詔如律。永樂二年。刑部言。河間民訟其母。有司反擬母罪。詔執其子。及有司罪之。三年。定文職官及中外旗校軍民人等。凡犯重條。依律科斷。輕者免決。記罪。其有不應侵損於人等項。及情犯重者。臨時奏請。十六年。嚴犯贓官吏之禁。初太祖重懲貪吏。詔犯贓者無貸。復勅刑部官吏受贓者。并罪通賄之人。徙其家於邊。著爲令。日久法弛。故復申飭之。二十九年。大理卿虞謙言。誑騙之律。當杖而流。今梟首非詔書意。命如律擬斷。宣德二年。定老幼殘疾男婦誣告人。罰鈔贖罪例。時江西按察使黃翰言。民間無籍之徒。好興詞訟。輒令老幼殘疾男婦。誣告平人。必更議涉虛。加罰乃可。遂定議。凡笞杖折鈔二千

貫每徒一等折杖二十。三流竝折杖百四十。所罰鈔悉如笞杖所定。其後憲宗時。南京有犯誣告十人以上。例發口外爲民。而年逾七十。律應收贖者。更著令。凡年七十以上。十五以下。及廢疾者。依律論斷。例應充軍。瞭哨口外爲民者。仍依律發遣。若年八十以上。及篤疾。有犯應永戍者。以子孫發遣。應充軍以下者。免之。初制。凡官吏人等。犯枉法贓者。不分南北。俱發北方邊衛充軍。正統五年。行在三法司言。洪武定律時。鈔貴物賤。所以枉法贓。至百二十貫者。免絞充軍。今鈔賤物貴。若以物估鈔。至百二十貫。枉法贓。俱發充軍。輕重失倫矣。今後文職官吏人等。受枉法贓。比律該絞者。估鈔八百貫之上。俱發北方邊衛充軍。其受贓不及前數者。視見行例發落。

從之。八年。大理寺言。律載竊盜初犯。刺右臂。再犯。刺左臂。三犯絞。今竊盜遇赦。再犯者。咸坐以初犯。或仍刺右臂。或不刺。請定爲例。章下。三法司議。刺右遇赦。再犯者。刺左。刺左遇赦。又犯者。不刺立案。赦後三犯者。絞。帝曰。竊盜已刺。遇赦再犯者。依常例。擬不論赦。仍通具前後所犯。以聞。後憲宗時。都御史李秉。援舊例奏革。既而南京盜王阿童。五犯。皆遇赦免。帝聞之。詔仍以赦前後三犯爲令。至神宗時。復議奏。請改遣云。十二年。以知縣陳敏政言。民以後妻所攜前夫之女爲子婦。及以所攜前夫之子爲婿者。竝依同父異母姊妹律。減等科斷。成化元年。遼東巡撫滕照言。大明律。乃一代定法。而決斷武臣。獨舍律用例。武臣益縱蕩不檢。請一切用律。詔從之。武

臣被黜降者。騰口誹訕。有司畏事。復奏革其令。弘治六年。太常少卿李東陽言。五刑最輕者笞杖。然杖有分寸。數有多寡。今在外諸司。笞杖之罪。往往致死。縱令事覺。不過以因公還職。以極輕之刑。置之不可復生之地。多者數十。甚者數百。積骸滿獄。流血塗地。可為傷心。律故勘平人者。抵命。刑具非法者。除名。偶不出此。便謂之公。一以公名。雖多無害。此則情重而律輕者。不可以不議也。請凡拷訊輕罪。卽時至死。累二十或三十人以外。本律外仍議行降調。或病死不實者。并治其醫。乃下所司議處。十三年。定竊盜三犯罪例。法司以南京有三犯竊盜。計贓滿百貫者。犯當絞斬。罪雖雜犯。其情頗重。三犯前罪。卽累惡不悛之人。難准常例。其不滿貫。犯徒流以下

罪者。雖至三犯。原情實輕。宜特依常例治之。議上報允。十六年。給事中孫楨言。新頒條例。視律較嚴。按律縱放軍人歇役者。一名杖八十。每一名加一等。例則額設軍伴之外。多占五名以下者。降一級。律私借官馬。或轉借與人。及借之者。各笞五十。驗日追僱債錢入官。計錢重者。坐贓論加一等。例則私借及轉借與人。五匹以下。降一級。旣曰自五以下。則占役一軍。占乘一馬。皆當從降級例科斷矣。以此繩人。未免太苛。請重校定。法司覆議。謂條例難改。其借占人馬。數不及五者。請如所奏。仍依律斷。從之。嘉靖十五年。時有以手足毆人傷重。延至辜限外死者。部擬鬪毆殺人論絞。大理寺執嘉靖四年例。謂當以毆傷論笞。部臣言。律定辜限。而問刑條例。又謂鬪

毆殺人。情真事實者。雖延至限外。仍擬死罪。奏請定奪。臣部擬上。每奉宸斷。多發充軍。蓋雖不執前科。亦僅末減之耳。毆傷情真。至限外死。卽以笞斷。是乃僥倖免人也。且如以兇器傷人。雖平復。例亦充軍。豈有真毆人致死。偶死限外。遂不當一兇器傷人之罪乎。矧四年例已報罷。請諭中外。仍如條例便。詔如部議。自後有犯辜限外人命者。俱遵律例議擬。奏請定奪。隆慶二年。大理少卿王諍言。問刑官每違背律例。獨任意見。如律文所謂。凡奉制書有所施行而違者。杖一百。本指制誥而言。今則操軍違限。守備官軍不入直。開場賭博。槩用此例。律文犯姦條下。所謂買休賣休。和娶人妻者。本指用財買求其妻。又使之休賣其妻。而因以娶之者言也。故律應離

異歸宗。財禮入官。至若夫婦不合者。律應離異。婦人犯姦者。律從嫁賣。則後夫憑媒用財。娶以爲妻者。原非姦情。律所不禁。今則槩引買休賣休和娶之律矣。所謂不應得爲而爲者。笞四十。重者杖八十。蓋謂律文該載不盡者。方用此律也。若所犯明有正條。自當依本條科斷。今所犯毆人成傷。罪宜笞。而議罪者。則曰除毆人成傷。律輕不坐外。合依不應得爲而爲之事理。重者律杖八十。夫旣除毆人輕罪不坐。則無罪可坐矣。而又坐以不應得爲。臣誠不知其所謂。刑部尚書毛愷力爭之。廷臣皆是。爭議得旨。買休賣休。本屬姦條。今後有犯。非係姦情者。不得引用。他如故萬曆中。左都御史吳時來。申明律例六條。一律稱庶人之家。不許存養奴婢。蓋謂功臣家

方給賞奴婢。庶民當自服勤勞。故不得存養。有犯者皆稱僱工人。初未言及縉紳之家也。縉紳之家存養奴婢。勢所不免。合令法司酌議。無論官民之家。立券用值。工作有年限者。以僱工人論。受值微少。工作計月日者。以凡人論。若財買十五以下。恩養日久。十六以上。配有室家者。視同子孫論。或恩養未久。不曾配合者。庶人之家。仍以僱工人論。縉紳之家。視奴婢律論。一律稱偽造諸衙門印信者。斬。惟銅鐵私鑄者。故斬。若篆文雖印。形質非印者。不可謂之偽造。故例又立描摸充軍之條。以後偽造印信人犯。如係木石泥蠟之類。止引描摸之例。若再犯擬斬。偽造行使止一次。而賊不滿徒者。亦准竊盜論。如再犯引例。三犯引律。一律稱竊盜三犯者。絞。以曾經

刺字爲坐。但賊有多寡。卽擬有輕重。以後凡遇竊盜三犯。俱在赦前。俱在赦後者。依律論絞。或赦前後所犯。并計三次者。皆得奏請定奪。錄官附入矜疑辨問疏內。并與改遣。一強盜肆行劫殺。按賊擬辟。決不待時。但其中豈無羅織讐叛。妄收抵罪者。以後務加參詳。或賊証未明。遽難懸斷者。俱擬秋後斬。一律稱同謀共毆人。以致命。傷重下手者。論絞。原謀餘人。各得其罪。其有兩三人共毆一人。各成重傷。難定下手及係造謀主令之人。遇有在監禁斃者。卽以論抵。今恤刑官。遇有在家病故。且在數年之後者。卽將見監下手之人。擬從矜宥。是以病亡之軀。而抵毆死之命。殊屬縱濫。以後毋得一槩准抵。一在京惡逆。與強盜真犯。雖停刑之年。亦不時處決。乃寬

惡至於殺父。卽時凌遲。猶有餘憾。而在外此類。反得遷延歲月。以故事當類奏。無單奏例耳。夫單奏急詞也。類奏緩詞也。如此獄在外數年。使其瘼死。將何以快神人之憤哉。今後在外。凡有此者。御史單詳到院。院寺單奏決單一到。卽時處決。其死者下府州縣戮其尸。庶典刑得正。旨下部寺酌議。俱從之。惟偽造印文者。不問何物成造。皆斬報可。

贖刑本虞書呂刑。有大辟之贖。後世皆重言之。至宋時尤慎贖罪。非八議者。不得與。明律頗嚴。故凡朝廷有所矜恤。限於律而不得伸者。一寓之於贖例。所以濟法之太重也。又國家得時藉其入。以佐緩急。而實邊足儲賑荒。官府頒給諸大費。往往取給於贖贖二者。故贖法比歷代特詳。凡贖法有二。有


律得收贖者。有例得納贖者。律贖無敢損益。而納贖之例。則因時權宜。先後互異。其端實開於太祖云。律凡文武官。以公事犯笞罪者。官照等收贖錢。吏每季類決之。各還職役。不附過。杖以上。記所犯罪名。每歲類送吏兵二部。候九年滿考。通記所犯次數黜陟之。吏典亦備。銓選降敘。至於私罪。其文官及吏典。犯笞四十以下者。附過還職。而不贖。笞五十者。調用軍官杖以上。皆的決。文官及吏杖罪。竝罷職不敘。至嚴也。然自洪武中年。已三下令。准贖及雜犯死罪以下矣。三十年。命部院議定贖罪事例。凡內外官吏犯笞杖者。記過。徒流遷徙者。俸贖之。三犯罪之。如律。自是律與例。互有異同。蓋先許之得贖。必待其不悛。至三犯。而後以律治之。明律爲不得已而

用也。及頒行大明律御製序。雜犯死罪徒流遷徙等刑。悉視今定贖罪條例科斷。於是例遂輔律而行。仁宗初即位。諭都察院言。輸罰工作之令行。有財者悉倖免。宜一論如律。久之其法復弛。正統間。侍講劉球言。輸罪非古。自公罪許贖外。宜悉依律。時不能從。其後循太祖之例。益推廣之。凡官吏公私雜犯。准徒以下。俱聽運炭納米等項贖罪。其軍官軍人。照例免徒流者。例贖亦如之矣。贖罪之法。明初嘗納銅。成化間嘗納馬。後皆不行。不具載。惟納鈔納錢納銀常竝行焉。而以初制納鈔為本。故律贖者曰收贖律鈔。納贖者曰贖罪例鈔。永樂十一年。令除公罪依例紀錄收贖。及死罪情重者。依律處治。其情輕者。斬罪八千貫。絞罪及榜例死罪六千貫。流徒杖

笞。納鈔有差。無力者發天壽山種樹。宣德二年。定笞杖罪囚。每十贖鈔二十貫。徒流罪名。每徒一等折杖二十。三流竝折杖百四十。其所罰鈔。悉如笞杖所定。無力者發天壽山種樹。死罪終身徒流。各按年限。杖五百株。笞一百株。景泰元年。令問擬笞杖罪囚。有力者納鈔。笞十二百貫。每十以二百貫遞加。至笞五十為千貫。杖六十千八百貫。每十以三百貫遞加。至杖百為三千貫。其官吏贓物。亦視今例折鈔。天順五年。令罪囚納鈔。每笞十鈔二百貫。餘四笞遞加百五十貫。至杖六十。增為千四百五十貫。餘杖各遞加二百貫。成化二年。令婦人犯法贖罪。弘治十四年。定折收銀錢之制。例難的決。人犯并婦人有力者。每杖百應鈔二千二百五十貫。折銀一兩。每

十以二百貫遞減。至杖六十。為銀六錢。笞五十。應鈔七百五十貫。折銀五錢。每十以百五十貫遞減。至笞二十。為銀二錢。笞十。應鈔二百貫。折銀一錢。如收銅錢。每銀一兩。折七百文。其依律贖鈔。除過失殺人外。亦視此數折收。正德二年。定錢鈔兼收之制。如杖一百。應鈔二千二百五十貫者。收鈔千一百二十五貫。錢三百五十文。嘉靖七年。巡撫湖廣都御史朱廷聲言。收贖與贖罪有異。在京與在外不同。鈔貫止聚於都下。錢法不行於南方。故事審有力。及命婦軍職正妻。及例難的決者。有贖罪例鈔。老幼廢疾。及婦人餘罪。有收贖律鈔。贖罪例鈔。錢鈔兼收。如笞一十。應鈔二十貫。收錢三十五文。其鈔百貫。折銀一錢。杖一百。應鈔二千二百五十貫。收錢三百

五十文。其鈔二千二百五十貫。折銀一兩。今收贖律鈔。笞一十。止贖六百文。比例鈔。折銀不及一釐。杖一百。贖鈔六貫。折銀不及一分。似為太輕。蓋律鈔與例鈔。貫既不同。則折銀亦當有異。請更定為則。凡收贖者。每鈔一貫。折銀一分二釐五毫。如笞一十。贖鈔六百文。則折銀七釐五毫。以罪重輕。遞加折收。帝從其奏。令中外問刑諸司。皆以此例從事。是時重修條例。奏定贖例。在京則做工。每笞一十。做工一月。折銀三錢。至徒五年。折銀十八兩。運囚糧。每笞一十五斗。至徒五年。五十石。運灰。每笞一十。一千二百斤。折銀一兩二錢六分。至徒五年。六萬斤。折銀六兩。至徒五年。三十九兩。運水和炭五等。每笞一十。三百斤。折銀四錢。至徒五年。八千五百斤。折銀十七兩。運灰最重。運炭最輕。在外則有力稍有力二等。初有頗有力。次有力。等。因御史言而革。其有力視在京



運囚糧每石米五斗穀一石至徒五年米五十石稍有力穀一百石舊制折銀上庫至是改折穀上倉視在京做工之年月以為折贖每石一石工價三錢婦人審有力與命婦軍職正妻及例難的決之人贖罪應錢鈔兼收者答杖每一十折收銀一錢其老幼廢疾婦人及天文生餘罪收贖者每答一十應鈔六百文折收銀七釐五毫於是輕重適均天下便之至萬曆十三年復申明焉遂為定制凡律贖若天文生習業已成能專其事犯徒及流者決杖一百餘罪收贖婦人犯徒流者決杖一百餘罪收贖如杖六十徒一二貫除決杖准訖六貫餘鈔六貫折銀七分五釐餘做此其決杖一百審有力又納例鈔二千二百五十貫應收錢三百五十文鈔一千一百二十五貫凡年七十以上十五以下及廢疾犯流以下收贖八十以下盜及傷人者亦收贖凡犯罪時未老疾而

事發時老疾者依老疾論得收贖若在徒年限內老疾亦如之謂如六十九以下犯罪年七十事發或無疾時犯罪有廢疾後事發得依老疾收贖他或七十九以下犯罪八十事發或廢疾時犯罪篤疾時事發得入上請八十九犯罪九十事發得勿論不在收贖之例矣○徒限內老疾收贖例如犯杖六十徒一年一月之後老疾合計全贖鈔十二貫除已杖六十准三貫六百文剩徒一年應八貫四百文計算每徒一月贖鈔七百文已役一月准贖七百文外未贖十一月應收贖七貫七百文餘做此○老幼廢疾收贖惟雜犯五年仍科之蓋在明初即真其誣告例告二事以上輕實重虛或犯死罪不可以徒論也告一事誣輕為重者已論決全抵剩罪未論決答杖收贖徒流杖一百餘罪亦聽收贖假如告人答三十內止一十實已全抵剩二十之罪未決收贖一貫二百文假如告人杖六十內止二十實已決全抵剩四十之罪未決收贖二貫四百文假如告人杖六十徒一年內止杖五十實全抵剩杖一十徒一年之罪未決徒一年折杖六十併杖共七十收贖四貫二百文假如告人未決杖一十折杖二十千里折杖一百二十內止杖六十徒一年折杖六十實剩杖一百收贖鈔六貫已決准徒四年除實外全抵剩杖四十徒

三年。此據收贖鈔圖。答杖徒流各舉一見。又過失傷人。准

例。每笞及杖十折鈔六百文。以次遞加。科之。鬪毆傷人。依律收贖。至雜犯斬絞者。收贖鈔四十二貫。內鈔

八千四百文。已徒五年。再犯徒收贖。鈔三十貫。若犯徒流存留

養親者。止杖一百。餘罪收贖。諸贖罪之名雖同。其贖法各別。

後計徒流年限。一視老幼例贖之。杖一百治其應。得之罪。視老幼贖使之得遂其養也。此律後不行。天文生婦

女犯徒流。決杖一百。餘罪收贖者。雖罪止杖六十徒一年。亦

決杖一百。律所謂應加杖者是也。皆先依本律。議其所犯徒

流之罪。以誥減之。至臨決時。某係天文生。某係婦人。依律決

杖一百。餘收贖所決之杖。並須一百者。包五徒之數也。然與

誣告收贖剩杖不同。蓋收贖餘徒者。決杖而贖。徒收贖剩杖

者。折流歸徒。折徒歸杖。而照數收贖之。其法各別也。其婦人

犯徒流。成化八年定例。除姦盜不孝與樂婦外。若審有力并

決杖。亦得以納鈔贖罪。例每杖十折銀一錢為率。凡律所謂

收贖者。贖餘罪也。其例得贖罪者。贖決杖一百也。徒杖兩項。

分科之。除婦人。餘囚徒流。皆杖決不贖。惟弘治十三年。許樂

戶徒杖笞罪。亦不的決。此律鈔之大凡也。例鈔自嘉靖二十

九年定例。凡軍民諸色人役。及舍餘審有力者。與文武官吏

監生。生員。冠帶官。知印。承差。陰陽生。醫生。老人。舍人。不分笞

杖。徒流。雜犯。死罪。俱令運灰運炭等項贖罪。此上係不若官

吏人等。例應革去職役。此係行止與軍民人等審無力者。笞

杖。罪的決。徒流。雜犯。死罪。各做工。擺站。哨瞭。發充儀從。情重

者。煎鹽炒鐵。死罪。五年。流罪。四年。徒按年限。其在京軍丁人

等無差占者與例難的決之人笞杖亦令做工時新例犯姦盜受贓爲行止有虧之人槩不許贖罪唯軍官革職者俱運炭納米等項發落不用五刑條例的決實配之文所以寬武夫重責文吏也於是在京惟行做工運囚糧等五項在外惟行有力稍有力二項法令益徑省矣要而論之律鈔輕例鈔重然律鈔本非輕也祖制每鈔一文當銀一釐所謂笞一十折鈔六百文定銀七釐五毫者卽當時之銀六錢也所謂杖一百折鈔六貫銀七分五釐者卽當時之銀六兩也以銀六錢比例鈔折銀不及一釐以銀一兩比例鈔折銀不及一分而欲以此懲犯罪者之心宜其勢有所不行矣特以祖宗律文不可改也於是不得已定爲七釐五毫七分五釐之制而

其實所定之數猶不足以當所贖者之罪然後例之變通生焉考洪武朝官吏軍民犯罪聽贖者大抵罰役之令居多如發鳳陽屯種滁州種苜蓿代農民力役運米輸邊贖罪之類俱不用鈔納也律之所載笞若干鈔若干文杖若干鈔若干貫者垂一代之法也然按三十年詔令罪囚運米贖罪死罪百石徒流遞減其力不及者死罪自備米三十石徒流十五石俱運納甘州威虜就彼充軍計其米價脚價之費與鈔數差不相遠而其定爲贖鈔之等第固不輕於後來之例矣然罪無一定而鈔法之久日變日輕此定律時所不及料也卽永樂十一年令斬罪情輕者贖鈔八千貫絞及榜例死罪六千貫之詔言之八千貫者律之八千兩也六千貫者律之六

千兩也。下至杖罪千貫。笞罪五百貫。亦一千兩五百兩也。雖革除之際。用法特苛。豈有死罪納至八千兩。笞杖罪納至一千兩五百兩。而尚可行者。則知鈔法之弊。在永樂初年。已不啻輕十倍於洪武時矣。宣德時。申交易用銀之禁。冀通鈔法。至弘治而鈔竟不可用。遂開准鈔折銀之例。及嘉靖新定條例。俱以有力稍有力二科贖罪。有力米五斗。准律之納鈔六百文也。稍有力工價三錢。准律之做工一月也。是則後之例。鈔纔足比於初之律鈔耳。而況老幼廢疾。諸在律贖者之銀。七釐五毫。准鈔六百文。銀七分五釐。准鈔六貫。凡所謂律贖者。以比於初之律鈔。其輕重相去。尤甚懸絕乎。唯運炭運石諸罪例稍重。蓋此諸罪。初皆令親自赴役。事完寧家。原無納

贖之例。其後法令益寬。聽其折納。而估算事力。亦略相當。實不為病也。大抵贖例有二。一罰役一納鈔。而例復三變。罰役者。後多折工值納鈔。鈔法既壞。變為納銀納米。然運灰運炭。運石運甓。運碎甓之名尚存也。至萬曆中年。中外通行。有力稍有力二科。在京諸例。并不見施行。而法益歸一矣。所謂通變。而無失於古之意者。此也。初令罪人得以力役贖罪。死罪拘役終身。徒流按年限。笞杖計日月。或修造。或屯種。或煎鹽炒鐵。滿日疎放。疎放者。引赴御橋叩頭畢。送應天府。給引寧家。合充軍者。發付陝西司。按籍編發。後皆折納工價。惟赴橋如舊。宣德二年。御史鄭道寧言。納米贖罪。朝廷寬典。乃軍儲倉。拘係罪囚。無米輸納。自去年二月至今。死者九十六人。刑

部郎俞士吉嘗奏囚無米者請追納於原籍匠仍輸作軍仍備操若非軍匠則遣還所隸州縣追之詔從其奏初制流罪三等視地遠近邊衛充軍有定所蓋降死一等唯流與充軍爲重然名例律稱二死三流各同爲一減如二死遇恩赦減一等卽流三千里流三等以大誥減一等皆徒五年犯流罪者無不減至徒罪矣故三流常設而不用而充軍之例爲獨重律充軍凡四十六條諸司職掌內二十二條則洪武間例皆律所不載者其嘉靖二十九年條例充軍凡二百十三條與萬曆十三年所定大略相同洪武二十六年定應充軍者大理寺審訖開付陝西部本部置立文簿註姓名年籍鄉貫依南北籍編排甲爲一冊一進內府一付該管百戶領去充

軍如浙江河南山東陝西山西北平福建直隸應天廬州鳳陽淮安揚州蘇州松江常州和州滁州徐州人發雲南四川屬衛江西湖廣四川廣東廣西直隸太平寧國池州徽州廣德安慶人發北平太寧遼東屬衛有逃故按籍勾補其後條例有發烟瘴地面極邊沿海諸處者例各不同而軍有終身有永遠永遠者罰及子孫皆以實犯死罪減等者充之明初法嚴縣以千數數傳之後以萬計矣有丁盡戶絕止存軍產者或并無軍產戶名未除者朝廷歲遣御史清軍有缺必補每當勾丁逮捕族屬里長延及他甲雞犬爲之不寧論者謂旣減死罪一等而法反加於刀鋸之上如革除所遣謫至國亡戍籍猶有存者刑莫慘於此矣嘉靖間有請開贖軍例者

世宗曰。律聽贖者。徒杖以下小罪耳。死刑矜疑。乃減從謫。發不可贖。御史周時亮復請。廣贖例。部議審有力者銀十兩。得贖三年以上。徒一年。稍有力者半之。而贖軍之議卒罷。御史胡宗憲言。南方之人。不任兵革。其發充邊軍者。宜令納銀自贖。部議以爲然。因擬納例以上。帝曰。豈可預設此例。以待犯罪之人。復不允。萬曆二年。罷歲遣清軍御史。并於巡按。民獲稍安。給事中徐桓言。死罪雜犯。准徒充軍者。當如其例。給事中嚴用和。請以大審可矜人犯。免其永戍。皆不許。而命法司定例奉特旨。處發叛逆家屬子孫。止於本犯親枝內。勾補盡絕。卽與開豁。若未經發遣而病故。免其勾補。其實犯死罪。免死充軍者。以著伍後所生子孫替役。不許勾原籍子孫。其他


充軍及發口外者。俱止終身。崇禎十一年。諭兵部編遣事宜。以千里爲附近。二千五百里爲邊衛。三千里外爲邊遠。其極邊烟瘴。以四千里外爲率。止拘本妻。無妻則已。不許擅勾親鄰。如衰痼老疾。准發口外爲民。十五年又諭。欲令引例充軍者。准其贖罪。時天下已亂。議卒不行。明制充軍之律最嚴。犯者亦最苦。親族有科斂軍裝之費。里遞有長途押解之擾。至所充之衛。衛官必索常例。然利其逃去。可乾沒口糧。每私縱之。其後律漸弛。發解者不能十一。其發極邊者。長解輒賄兵部。持勘合至衛。虛出收管。而軍犯顧在家偃息云。

明史藁

志第七十一終

375
32

刑部令各道出外巡按而軍賦亦乘時息云
其符通數者其職即謂云
其將大內等對其職即謂云
費里數百員其職即謂云
不計其數其職即謂云
其將大內等對其職即謂云
費里數百員其職即謂云
不計其數其職即謂云



其將大內等對其職即謂云
費里數百員其職即謂云
不計其數其職即謂云
其將大內等對其職即謂云
費里數百員其職即謂云
不計其數其職即謂云

安政三年

